

四明談助目錄

第五本北城三

卷十一

唐鄞州治興廢述 寶慶志曹志聞志又 元時城池廢建記

唐治郡官制述 曹志又 賢牧裴敬 王密 吳謙 王沐

任侗 韓察 應彪 于季友 羊僕 黃晟諸傳記 唐

平袁晁 栗鎧 裘甫 王郢 鍾季文 董昌諸亂又

觀察元稹罷進海味事附 句餘土音饒歌二首

宋明州治詳 郡縣建置 治郡官制述 曹志 設沿海置制

司條例述 聞志列 賢牧錢億 李夷庚 錢公輔 曾鞏

仇恂 張津 魏王愷 范成大 程大昌 程覃 胡

四明談助 卷十一 目一

渠 陳塏 顏頤仲 章大醇 吳潛 葉夢鼎 通守

陳瓘 蘇玘 孫子秀諸傳 古跡羔羊齋 桃源洞

百花臺 梅莊 九經堂 老香堂 翁芳亭 蒼雲堂

小教場 甲仗庫 公使庫 生明軒 淨涼亭 春華

亭 秋思亭 四明窻 雙檜泉 木香臺 占春亭諸

記附 范石湖詩一首 吳正肅詞五首 勾餘土音詩四

首又附逸事 蘓子瞻乞守四明 苗長官運屋歸里 蔣

安義受僞職 魏王以時物奉兩宮 歸葬築新壩 仇

待制惠及鸛雀 周直閣好音樂 吳制相訪厲學士

葉信公從學趙門 顏制使行鄉飲禮 黃運判捐軀成

塘 二賊臣賣友迎降諸記

元慶元路治詳郡縣建置治路官制俱曹志宣慰司元

帥府治慶元路總管治總管府題名記石刻古松

詩俱至正續志列賢牧伯行完者都泰不花苦思

丁王元恭邱楠諸傳述敬止錄方國珍叛服無定事

元明史授方氏官爵後謀叛族誅事附勾餘土音賦沿海

城一首

方國珍府第述鮎埼亭集方氏萬戶府述嘉靖志

寧波衛指揮使司述嘉靖志聞志敬止錄附新按明季兵

制大變述聞志附指揮遺事陳商因渡受賞潘裡殉交

趾難劉錦殉倭難魏安世工吟咏馬瑜抱憾自刎

馬斯臧工詞賦諸記

四明談助

卷十一

目二

明市舶提舉司述嘉靖志敬止錄市舶司興廢探明史

安遠驛規制述敬止錄并記明初通使東夷倭使焚掠

汪直等入寇俱探明史俞戚二帥平倭亂錄曹志附南

雷文定蔣宗信傳後論

巡視海道司述嘉靖志錢志附王忠烈迎賓館記一首列明

海道楊瑄盧若騰國朝海道王爾祿陳中孚諸傳

協佑侯廟述聞志宋惠民藥局述開慶志

卷十二

宋貢士院附新按宋時貢舉并明制述寶慶志敬止錄

浚井滅怪事探癸辛雜識元織染局述至正續志

桂芳第倪氏述族望表錄僉事懋熹評事元楷傳并逸事附

句餘土音詩

道後徐附新按并同族科名錄處士大器傳

袁狀元第述聞志附新按錄古跡秀野園是亦樓諸記并

新按列侍郎燮知州肅尚書甫處士哀諸傳并三

世逸事絜齋書鈔後序

明季張尚書第附新按列刑部圭章殉難尚書煌言傳并

謝春草集傳後記鮎埼亭集傳後記神道碑後段

張督師畫像記附勾餘土音薤露詞四首袁陶軒鄧北

雜詩一首

郡學宮詳歷朝規制述曹志敬止錄古跡歸咏亭杏壇

草庭述敬止錄師儒之制有孔子廟堂議鄉飲酒禮

四明談助 卷十二

目三

述曹志敬止錄列宋學師鄭耕老傅伯成李韶方

萬里魏新之元學師黃裳孔昭孫王厚孫明

學師崔植成矩陳中立諸傳附遺事泮水禁蛙鳴

林司戶倡復州學郭公子以北學教諸生顏制帥蠲

除砂租顧神童辭貢不就曹秀才故婦悔羨俱郡邑

志敬止錄

明鄉隅各立社學備述聞志

四明談助卷十一

府城脉自西來過乾溪頭反從東入起府山結府山并府前  
東西南三面距河等跡已詳于前矣茲再錄自府治西至府  
西河其上有舊府治元都元帥府明寧波衛治今海道治宋  
惠民藥局等跡于後

唐鄞州治 開元後置明州

初夏后禹東巡狩至大越朝諸侯上會稽崩而葬焉少康封  
庶子無餘于其地以奉廟祀是謂越國句章鄞鄮隸焉歷商  
及周二十餘世至句踐結怨于吳吳擊之敗保會稽使大夫  
種行成吳復封之地廣百里東至于鄞事見國語既返國期以報  
吳卒滅之欲置吳王甬東君百家則今昌國是已秦滅楚降

四明談助 卷十一

一

越君置會稽郡勾章鄞鄮始建縣漢順帝永建四年分浙江  
以北置吳郡而勾章鄞鄮隸會稽自若也三國鼎峙孫氏首  
據會稽畧平江東歷晉宋齊陳會稽或為國或為郡而三縣  
未有更革隋開皇九年始併餘姚鄞鄮入句章隸會稽郡大  
業初隸越州三年復隸會稽郡唐武德四年析句章置姚州

鄞州 寶慶志

唐高祖武德四年改會稽郡為越州罷勾章縣還餘姚之地  
為姚州以舊勾章鄞鄮之地置為鄞州不設縣其治在三江  
口即劉牢之所築處八年廢鄞州為鄞縣徙治故鄞城在賀山仍隸越  
州明皇開元二十六年從採訪使齊澣奏析鄞縣之地為鄞  
慈谿奉化翁山四縣別置明州統之治故勾章小溪鎮而州



縣始並建不隸越州矣

章州以四明山爲望故名慈谿古勾天

寶元年改明州爲餘姚郡肅宗至德初復爲明州代宗廣德

二年益以台之象山縣

台之寧海本古章安縣後又析是邑爲奉化邑地立象山縣初屬台後屬

明統縣凡五大歷六年海寇袁晁據鄞翁山二縣久不克復

遂廢翁山不治移鄞治于三江口以防之

卽前鄞州治

仍爲四縣

憲宗元和中分鄞縣地置望海鎮于甬江之海口不隸于州

而四縣之外復有一鎮

今之鎮海縣

穆宗長慶元年刺史韓察欲

移州城白觀察使薛戎戎上言明州北臨鄞江地形卑隘請

移明州置于鄞縣爲明州治而郡治始定鄞縣之附郭亦始

此志

宋寧宗朝升州爲府號慶元元元陞爲路順帝至正時復

稱明州府始遷州治後改寧波衛治卽今巡道治所自唐刺

#### 四明談助

#### 卷十一

二

史韓察徙州治于其地乃設有子城周圍四百二十丈環以

水宣宗大中十三年象山寇裘甫亂明州城門晝閉城故羅

以土樹柵景福間刺史黃晟拓基甃築始用磚石

聞志

元初隳天下城池垂六十餘年居民漸侵爲坦途至元五年

省命取勘起課官租舊子城直南中闕建明遠樓于其上餘

並廢雖有州東西二門之名實爲通衢至正八年台州方國

珍爲寇二十年浙東都元帥納麟哈刺以台密邇慶元復築

城爲脩青田劉基爲記後國珍受招安之命據城開江浙分

省復加修治

聞志

烏斯道有贈行省理問仲剛君治城序見敬

止錄

納麟哈刺築城在至正十二年時劉文成爲浙東元帥府都

事見錢謙益太祖實錄辨証文成文起句上嗣位之二十年蓋統順帝卽位改元元統盡二年改至元盡六年而共言之也若至正二十年主師已平慶元矣何悞至此敬止錄

### 唐治郡官制

刺史治郡其僚佐有別駕長史司馬各一人其屬有錄事參軍事一人司功司倉司田司兵司士參軍事各一人司戶司法參軍事各二人曹志

### 唐賢牧

#### 裴刺史傲

河東人大歷中刺明州適寇攘之餘悉心撫字一年而逋播以復田疇闢里塾興其賞人也不用財其罰人也不假

### 四明談助

#### 卷十一

三

威吏束手奉法無敢干紀後刺史王密爲撰紀德碑李陽

冰書

嘉靖志

今潘輿有裴聖君廟

#### 王刺史密

大歷中刺郡有惠政李舟撰去思碑顏真鄉書

嘉靖志

#### 吳刺史謙

字德裕大歷間刺史有善政郡民歆血而祀之

延祐志

今西

郊有澤民廟事詳澤民廟碑記

#### 王刺史沐

貞元四年刺郡修廢舉墜政治一新嘗捐俸立夫子廟落成之日民不告勞

成化志

#### 任刺史侗

貞元九年刺史城西廣德湖溉田四百頃公因故迹增修之

唐書地理志

韓刺史察

京兆人長慶元年刺史易縣治爲州治撤舊城更築新城功大而民不知役韓杼材爲文記之

嘉靖志

應刺史彪

字德彰汝南人長慶三年刺史建浮橋跨江五十五丈

延祐志

于刺史季友

太和六年刺史築仲夏堰溉田數千頃

唐書地理志

羊府君僕

四明談助

卷十一

四

世系里居未詳事見羊廟碑記

黃府君晟

乾寧中繼鍾季文爲刺史詳鄞塘鄉本傳并飲飛廟碑記張部將平袁晁

高隱學敬止錄云唐租庸使元載以吳越雖兵荒後民產猶給乃辟召豪吏分宰列邑以重斂之其州縣賦調積有逋違乃稽諸版籍不約戶品之上下但家有粟帛者則以人徒圍襲如擒捕盜賊然後簿錄其產而中分之甚者七八九時人謂之白著言其厚斂無名其所著者皆公然明白無所嫌避時有歌云上元官務剝削江淮之人多白著台州人袁晁因民心愁怨乘之以起衆二十餘萬僭號二曰昇國曰寶勝乾

元二年遂陷明州踰二年李光弼遣其將張伯儀討平之  
裴觀察擒栗鍠

德宗貞元十四年明州鎮將栗鍠殺刺史盧雲誘山賊作亂  
攻破浙東州郡十五年二月浙東觀察使裴肅擒栗鍠于台  
州送京師斬之通鑑時郡城猶在小溪也敬止錄

元觀察罷進海味

憲宗元和四年令明州歲進淡菜海蚶各一石五斗九年孔  
幾爲軍州刺史奏罷之十五年復令貢海味穆宗長慶初元  
積爲浙東觀察使復奏罷之元氏長慶集

王觀察斬裘甫

咸通元年裘甫陷象山官軍屢敗以安南經畧使王式爲浙

四明談助

卷十一

五

東觀察使以討之時吐蕃回鶻配江淮者其人習險阻便鞍  
馬舉籍管內得數百人式皆調其家又犒飲之衆皆願効死  
悉爲騎卒使騎將石宗本將之又奏得龍陂監馬二百匹于  
是閱諸營卒及土團子弟得四千人使導諸軍分路討之凡  
十九戰擒甫送京師斬之按崔琪心鏡大師碑言剡寇裘甫  
率徒二千入栖心寺則鄮亦被兵琪守明作碑在咸通末距  
甫亂十年許城隍考所云民閉子城門者卽此亂也敬止錄

劉鎮將平王郢

僖宗乾符三年浙西狼山鎮遏使王郢等作亂攻陷蘓常汛  
海入閩轉掠二浙大爲人患四年二月郢攻望海鎮掠明州  
鎮海節度使裴璩嚴兵不戰密招其黨朱實降之散其徒六



七千人郢又收餘衆東至明州甬橋鎮遏使劉巨容以筒箭射殺之餘黨皆平通鑑 據字挺秀見世系表困學紀聞 望海鎮卽舟山時地屬鄞甬橋李志作甬水橋

### 鍾季文刺明州

僖宗中和元年六月鄞賊鍾季文陷明州自立爲刺史唐書僖宗

紀 昭宗景福元年明州刺史鍾季文卒其將黃晟自稱刺史

唐書昭宗紀

敬止錄引寶慶志云僖昭之間盜賊蠡起晟結羣豪拒外盜郡守羊僕授以鄞塘鎮遏使尋遷奉化都護防遏兼飲飛兵馬使羊歿鍾季文繼之鍾歿衆乃戴晟攝守討平隣寇保護鄉并王深寧七觀云彼鍾黃之竊據郡乘幾于曲筆卽指此

### 四明談助

#### 卷十一

六

也然晟究未可以寇亂目之也

### 黃刺史拒董昌

乾寧三年錢鏐討董昌攻餘姚明州刺史黃晟遣指揮使梁

從晁率兵來應十國春秋

### 唐明州五亂

王伯厚云明州開元二十六年置訖于唐末凡五亂袁晁陷明州一也明州將栗鎰殺刺史二也王郢陷明州三也鍾季文陷明州四也明州將黃晟自稱刺史五也不及裘甫者意以其未陷城也敬止錄

勾餘土音甬上饒歌

### 臨淮將

詩語唐世明州八被兵困學紀聞僅載其五然唯袁晁  
裘甫爲最烈

安史擾二京浙河尚安堵旋復遭橫屠中阻我王路太尉臨  
淮將再清二京霧白旄已北還黃鉞勞南顧輾然而一笑謂  
此直狐兔徼幸起廣池妄思梗財賦不須老臣行一將直電  
赴刻期獻馘來瀛海歌篤祐爭覓長生艸以祝大節度

拒羅平

詩話黃攸飛晟其出身亦屬艸竊之徒至于助錢鏐拒  
董昌有可稱焉

羅平大妖鳥忽煽彼穢狂欲以狗脚朕易彼異姓王西鄰錢  
節使責言來戎行六州屬郡將亦或左右望鄞塘黃刺史獨  
自慨且慷共主雖以替大號豈可當會師聲正義一臂折孤  
狼功成渡桃水奏凱歌鏘鏘東西君子營晚節蔚有光

五代吳越明州治

唐昭宣帝天祐元年封錢鏐吳越王遂據其地歷五代守令  
之制無所改統縣五鄞梁開平三年改名鄞慈谿奉化象山望海梁開平三年

年改定海

宋明州治寧宗元年改慶元府

太宗太平興國二年吳越王錢俶納土置兩浙提刑轉運二  
司高宗紹興三年置沿海制置使後以明州升慶元府統縣  
六鄞慈谿奉化象山定海昌國以故翁山地置

宋治郡官制

宋太祖懲唐末五代藩鎮以親校爲刺史之弊乃改命京朝官出知軍州事軍謂軍政州謂民事也故其時郡守署銜率帶京朝官階而其下曰知某軍州事若府則曰知軍府事其貳有通判二人其幕職官有簽書判官廳公事一人節度推官一人節度判官一人觀察推官一人觀察判官一人節度掌書記一人觀察支使一人其諸曹官有錄事戶曹司法司理參軍各一人南渡以後四明爲股肱輔郡鎮以重兵于是郡間或以親王宰執爲之任至重也

曹志

宋設沿海制置司

宋沿海制置司水軍紹興二十一年兵隨司皆罷三十一年

四明談助

卷十一

八

金人入寇明州復屯殿司水軍二千人隆興元年海寇朱百五等倡亂戶部侍郎趙子瀟復帶沿海制置使知明州就領殿司軍三千人收捕二年寇平以明州密邇行都水陸控扼事體非輕撥付兵額四千人其統兵之官統制統領各一人正將三人副將三人分爲二十二隊此外又有禁軍廂軍土軍見後威果營註詳載聞志

宋賢牧

奉國軍節度使判明州錢康憲公億

字延世吳越王俶弟漢乾祐二年判明州宋太祖建隆元年州升奉國軍卽授公節度使內和兵民外固封守市無貳價道不拾遺浚廣德湖築塘周萬二千八百七十餘丈

它山堰壞公跪禱于神增築完固乾德五年卒謚康憲民立祠祀之成化志事蹟兼見大人堂下

李太守夷庚

眞宗天禧中以吏部員外事直史館知州事市有花樓神州將初至皆謁奠公毀其祠精地理學以鎮明嶺爲府治案山增高數丈徙建州學文廟合于子城東北自是賢才輩出浚東錢廣德二湖大興水利民立祠祀之嘉靖志

錢太守公輔

字君倚武進人仁宗嘉祐中知州事時酒場課額不足鄉民破產猶不供費公取酒場官鬻之分輕重以給役之不

復調民民蒙其惠曹志

四明談助

卷十一

九

曾太守鞏

字子固建昌人神宗熙寧中以度支員外郎守明州修築州城減冗費十之五六浚西湖作廣德湖記其爲務省民疾苦嘗曰爲人害者不去則居人不寧素不附權貴然善防患終亦莫能中傷嘉靖志

州通判陳忠肅公瓘

字瑩中號了翁南劍州人徽宗大觀中以越州簽判攝倅明州明州職田之入厚公不取悉籍于官以歸著明州尊堯集曹志正王氏之私書明君臣之大義有上明州尊堯集

表後贈謚忠肅聞志

制置使知軍州事仇公忞

字泰然益都人高宗紹興五年以浙東宣撫使知明州爲政務挫豪強獎良善吏受賂雖一錢不貸州罹兵火公斥厨錢助其費歲饑發官儲損其直民無死徙進直學士爲湖南安撫使

宋史本傳

直秘閣知軍州事張公津

孝宗乾道間以直秘閣知明州舉鄉飲酒禮歲以正月二日卽州庠舍菜率僚佐鄉士大夫及寓公序爵會拜于講堂三爵而退州人聚觀興感嘗作四明圖經實郡志所始也

嘉靖志

判明州軍州事魏王愷

王孝宗之子淳熙九年判明州輟屬邑田租以贍學得兩

四明談助

卷十一

十

岐麥圖以獻帝賜手詔嘉之七年薨于明州王治郡有仁聲四明父老乞建祠立碑以紀遺愛

宋史本傳

范太守成大

字致能吳郡人淳熙中知州事先是魏王守郡歲貢海物公奏言王國之懿親得獻兩宮臣不敢效尤孝宗從之

曹志

蘓通守玘

字訓直泉州同安人通判明州城東有造船塲晁景迂說之坐元符上疏錮不許親民來爲船官所著書及文章最多公慨然爲築祠立碣致其師尊之意陳忠肅瓘嘗諱于明而豐清敏稷明人也言于郡立二公祠于學宮風厲學者會歲歉常平使者朱文公熹屬以一郡荒政客米自海

道至者多請廣糴以爲後脩文公聞于朝如其請官至吏部郎中晚學于文公盡門人之禮

渭南文集

程太守大昌

光宗紹熙初知明州值歲豐酒稅逾額有挾朝命請增稅者公力拒之曰某可去稅不可增也

嘉靖志

兩浙提舉知軍府事程公覃

字會元寧宗嘉定六年爲提舉兩浙常平茶鹽摧沿海制置司事以東錢湖它山堰灌溉甚溥每患湮圯始置田租以所收歲給浚導者蠲海錯果蓏之征以惠民

成化志

兵部尚書知軍府事胡公榘

廬陵人理宗寶慶初以兵部尚書知慶元府先是錢湖湮

四明談助

卷十一

十一

塞程提舉置田給租以刺葑公修前議于農隙水退時先修運河諸磳開放水入江復放湖入河湖涸易施桃濬而運河貯湖水仍不妨春農民甚便之復以贏錢二萬八千餘緡增置田畝以其入分給漁戶人人歲六石令隨時薤絕葑根民懷其惠寶慶五年命錄事參軍廬陵羅濬取四明圖經重訂之文獻賴以有徵

嘉靖志

孫通守子秀

字元實越州餘姚人紹定進士通判慶元府主管浙東鹽事先是諸場鹽百袋附五袋名五釐鹽未幾提舉官以爲正數民困甚公奏免之

宋史本傳

陳太守塏

字子爽號可齋長樂人理宗淳祐初以秘閣修撰知慶元府興學造士勸恤民隱尤盡心水利建迴沙閘保豐礮民甚利焉

嘉靖志

顏太守顒仲

龍溪人淳祐五年以右文殿修撰知慶元府郡自桃花渡而東迄定海西市綿亘六十餘里故有河渠久湮塞灌溉失利民咸病之公甫下車卽諭民間開濬民皆樂從爲費五十五萬七千緡有奇越三旬而工成民德之因名之曰顏公渠瀕海沙岸爲勢豪所據名爲納稅于官實網其利而有之公爲申于相府先捐本府及制置使所入稅錢二萬二千餘緡勢家母得私占沿海民蒙其利

李志

四明談助

卷十一

十二

大府卿知軍府事章公大醇

淳祐八年以大府卿知慶元府十年以淘湖濬河竣事特轉朝奉大夫又以海道肅謐水利興修職事振舉除集賢殿修撰

嘉靖志

大學士判慶元府吳正肅公潛

字毅甫號履齋宣州寧國人嘉定丁丑狀元寶祐四年以觀文殿大學士判慶元府兼沿海制置大使加惠庠序篤意教養立永豐倉開惠民藥局在任三年尤究心水利于郡城平橋立水則刊平字于石視字之出沒爲啓閉至今民免墊溺之患

開慶志

知府兼制置使葉公夢鼎

字鎮之寧海人以資政殿學士知府事兼沿海制置使肅  
清海寇罪止首惡羨餘之費悉却不受建濟民倉以脩歲  
饑造驛舍以待賓旅咸淳三年召爲叅知政事宋史本傳  
葉信公夢鼎貴爲宰輔不忘貧約舊事壯歲客吾里從學  
城南楊氏書塾楊氏館遇甚厚咸淳丙寅以資政守四明  
舊往還皆重報之而以次子應友爲楊壻人咸服其盛德

清容居士集居

### 羔羊齋

在府治內淳熙間范太守成大建延祐志

范石湖題羔羊齋木芙蓉詩

慵妝酣酒夕陽濃洗盡霜痕看綺叢綠地團花紅錦障不知

### 四明談助

卷十一

十三

庭院有西風

句餘土音賦范石湖羔羊齋

石湖有故齋羔羊憶五縫三秋多佳氣長吟對芙蓉吾讀請  
罷進奏賦賢哉綽有大臣風不獨出使風節如鄭公况復風  
流在詩筒阿儂年來詩思竭乞靈願有執鞭從烹雞祭齋下  
魂魄倘相逢

### 桃源洞

紹興間韓太守璉建在郡治後圃之北又有佳趣亭集春亭  
容與亭悉繚以步廊雖雨雪不妨行樂嘉靖志郡圃舊總名桃  
源洞求其義桃源鄞鄉名也鑿子城通地隙故以洞名之耳  
今旣合郡圃于堂後又不欲盡捐舊額遂以新桃源榜之慶開



續志

吳正肅公詞

賀新涼

和翁處靜桃源洞韻

柏手闌干倚想回頭人非物是不知何處萬事情知都是夢  
聊復推遷夢裏也幻出雲山烟水白白紅紅雖褪盡儘昌條  
浪蕊皆春意時可醉醉扶起 瀛洲舊說神仙地奈江南猿  
啼鶴唳怨懷如此三五阿婆塗抹遍多少殘櫻剩李又過雨  
亭皋初霽慙愧故人相問訊但一回一見蒼頭耳誰念我鷓  
鷯志

百花臺

紹興間曹太守泳建在桃源洞之前後改爲安遠驛

成化志

四明談助

卷十一

十四

梅莊

在桃源洞之西北

嘉靖志

亭前舊有數梅吳太守潛增植至百

株因舊亭而加敞焉

開慶續志

九經堂

淳化元年詔頒國子監九經二年陳太守充作堂以藏之元  
祐三年李太守閱重建別求九經藏之胡幹化爲之賦

延祐志

老香堂

吳太守潛建在府治後面北植桂百本取山頭老桂吹古香  
之句以名前築一壇名月臺可坐三十客堂扁自題

開慶續志

吳正肅公詞

朝中措

老香堂和劉自昭韻

衰翁老大脚猶輕行到淨涼亭近日方憂多雨連朝且喜長  
晴謾尋歡笑翠濤杯滿金縷歌清况有蘭朋竹友柳詞賀句  
爭鳴

小重山 六月十四日老香堂前月臺玩月

碧霄如水月如鉦今宵知爲我特分明冰壺玉界兩三星清  
露下漸覺濕衣輕 高樹點流螢秋聲還又動客心驚吾家  
水月寄昭亭歸去也天豈太無情

句餘土音賦吳正肅公老香堂

當年牧守多賢侯一遊一豫膏澤流相公政績尤其尤開情  
布置亦最稠老香堂前眞清幽雲外芳踪供冥搜寒梅古檜  
迭相酬相公遺集今難求寶慶圖經幸尚留古詩漫詞珊瑚  
鈎峴山之樂如在眸相公遷播死循州四明花鳥亦淚流百  
株老香乘蒼虬化作遊縣天上游

翕芳亭

在老香堂之左亭前植杏三面積月丹開慶續志

蒼雲堂

在郡圃之北自老香堂爲步廊數十間周廻而至前有古檜  
數本奇甚疊石佐之堂額張學士卽之書開慶續志

吳正肅公詞

滿江紅 蒼雲堂後有桂樹爲冬青遮蔽低垂將殞矣戊午八月呼梓人伐之賦

斫却凡柯放巖桂出些頭地從此去引風披露暢條昌蕊待  
得清香千萬斛且饒老子爲知己趁今宵新月駕空來浮觴

裏 劉安笑淹留耳吳猛約何時是想故山深處翠垂金綴  
須信人生歸去好他鄉未必江山美問釵頭十二意如何非  
吾事

### 小教場

舊射亭在九經堂後開慶改元春遷舊圃于府堂後而取蒼  
雲堂之北爲小教場自大人堂

堂在府治北射圃中見寶慶志

接閱武廳爲

屋十三間以處士卒而前爲廊廡名類箭所武藏之門實居

其南

開慶續志

### 甲仗庫

初置于設廳前二廡之間後移于酒庫之北教場之南東阻  
郡圃西抵子城分爲六庫榜之曰武藏

開慶續志

### 四明談助

#### 卷十一

十六

### 公使庫

設廳前西廡之後乾道中守張津以簽判舊廡益之屋久而  
圯守胡榘重建凡一百六十一間磨有院碓有坊酒有棧錢  
米什物有庫公廳吏舍以及神字莫不整整

寶慶續志

### 生明軒

在蒼雲堂右面西下瞰方池極目無際

開慶續志

### 淨涼亭

在生明軒之右跨池面南爲納涼佳趣

開慶續志

### 春華亭

在檜山之東環植以桃立鞦韆其外

開慶續志

### 秋思亭

在檜山之西植橙菊芙蓉與四明窻隔池

開慶續志

### 四明窻

吳制相旣濬舊池跨兩虹于上而闢虛堂于中戶牖

四達似四明石窻因題斯扁

開慶續志

### 吳正肅公詞

滿江紅 四明窻

芳景無多又還是亂紅飛墜空悵望昭亭深處家山桃李柳  
眼花心都脫換蜂須蝶翅難沾綴謾相攜一笑競良辰春醪  
美 金獸爇香風細金鳳拍歌雲膩儘秦簫燕管但逢場爾  
只恐思鄉情味惡怎禁寒食清明裏問此翁不止四宜休翁  
歸未

雙檜泉

在四明窻之西南其東則木香臺也二檜虬拳古挺其下泉  
聲涓涓然甃爲圓池營摺廊五間左右二檜爲憇息之所吳  
制相題雙檜泉三字于池上 開慶續志

木香臺

四明談助

卷十一

十七

臺高三尺植花如屏題曰自遠取韓子蒼無風香自遠意繞  
臺爲廊屋二十間 開慶續志

占春亭

嘉定間程太守覃建春風堂占春亭在其南淳祐六年顏太  
守頤仲建 延祐志

勾餘土音顏右文占春亭

顏公多遺愛六十里長渠澤與雙湖並禾看萬斛儲春來歸  
曲榭桃落滿前除 吳丞相咏是亭句也 何以酬明德風流渺故墟

蘓子瞻乞守四明

子瞻與范子豐書云欲乞東南一郡聞四明明年四月成資  
尙未除人託爲問看又書云近乞四明未知可得否又云高

麗使已還四明可以易守更當理前請也志聞

苗長官運屋歸里

苗振熙寧初知明州致仕歸鄞自明州造一堂極華壯載以歸或言鄞州置田亦多機數而得時王逵亦居鄞作詩嘲之曰伯起雄豪世莫偕官高祿重富于財田從汶上天生出堂自明州地架來十隻畫船風破浪兩行紅粉夜傳杯自憐憔悴東隣叟草舍茅檐真可哈伯起振字東鄰逵自謂是時王荆公秉政聞此詩遽遣王子韶為浙路察訪于明州廉得其實遂起大獄振竟至削奪臨漢隱居詩話

熙寧初張載為崇文院校書明州苗振獄起往治之末殺其

罪宋史張載傳

四明談助 卷十一

蔣安義受僞職伏誅

安義本越州剡縣人冒明州鄞籍登徽宗大觀三年進士以賊敗建炎初金人至明州輒投拜盡籍土著寄居姓名以告金將喜之搜索無遺既去以安義知明且授以兩浙轉運司印慈谿令林叔豹引鄉兵入州執安義奪其印杖殺之寶慶志魏王以時物奉兩宮

哲宗紹聖三年詔明州歲貢車螯玉柱五十觔俗謂之紅蜜

丁東坡所稱江瑤柱也李璧注王荆公詩後停止孝宗初魏王愷判

明州以海物奉兩宮淳熙六年王薨范石湖起代之石湖奏

張津伯圭魏王皆國之懿親時貢節物臣外臣不敢效尤帝

命停貢而罷進奉局周必大撰神道碑

勾餘土音四明貢物江鯨柱

皇子魏王以時物奉兩宮非常貢也

江鯨風味良足配荔枝嫩肪輕依雙柱弱不支海隅春水初生正及時西施縮舌不敢比芳脂吾鄉鮎埼所產過閩種別校添丁兄弟負清姿更須郇公厨人善和齊睨視釜中揚沸切莫遲調以蜀雞之湯清汨汨侑以新韭之牙綠離離斯在南客南烹居絕品發風動氣亦復非所辭

山谷語

所苦脆質不堪度三日難教踰江涉湖充鼎鼐堪笑唐家中葉求海錯歲取四十萬人貢京師一騎紅塵飛起千驛擾下及蛤蚶螺蠣無所遺江鯨正賴脆質得自免坡髯微文巧詆未爲宜自從魏王作牧始傳致剡川地力幾復憂罷疲石湖奏罷兩宮進奉使甘棠百世足與孔元齊

四明談助

卷十一

十九

魏王歸葬創新壩

淳熙間魏王薨于四明將葬于越詔遣刑部尙書謝廓然運副韓彥質護喪使者旁午州縣震動初姚江至曹娥必由通明壩知上虞縣汪大定以通明壩高峻潮汐雖登僅過數舟則已涸矣于是增浚渣湖別于支港創小堰以通舟募游手二百人別以旗色分列左右俟大舟入引湖水灌之水溢堰平衆力扶喪舟以進畧無欹側舳艫相銜俄頃俱濟自是以來反以支港爲通衢非大旱水涸則無有由通明者矣世傳史彌遠所開有恩多怨多之謠非也

南雷文定

仇待制惠及鸛雀

仇愈徽猷自言頃年嘗爲明州晨起視事方受牒訴有鸛雀

翔舞庭下馳逐久之方去明日復來仇心異之遣一吏迹所至而觀其爲何旣出城數里所見一大樹鸛雀徑止其上視其巔則有巢焉數子啁啾其中其下方有數人持斧鋸將伐之者吏遽止之且引其人與俱見仇問伐樹何爲曰爲薪耳又問鬻之得幾何曰可得五千仇卽與之且告之曰是鸛連日來意若求救于我者異類而有知如此爾不可伐不然且及禍其人遂去因不敢伐

薛應旂浙江通志

### 周直閣好音樂

周邦彥字美成號清真錢塘人政和五年以直龍圖閣知明州好音樂能度曲著清真集二十卷樓宣獻公爲序嘉泰中陳杞守明州刻之蓋因其子孫居于鄞也

聞志

### 四明談助

#### 卷十一

二十

### 吳制相訪厲學士

辭祿歸田里幡然邁等倫玉壺邀好客畫舫泛長春閣筆詩章就馳心物候新機權不與並洞外一仙人

此詩制相所贈

厲學士思明字汝正紹熙四年進士歷官刑部侍郎遭讒退休紹定改元以原官徵兼資政殿學士居三載自知不爲奸黨所容屢疏乞罷及歸里多爲利物濟人之事且怡情詩酒結侶投閒制相吳潛判慶元每相過訪贈以詩可以見其風概矣卒年七十有三

聞志

### 葉信公從學趙門

宗室趙侍郎逢龍字應甫爲學淹博純實登嘉定進士歷知軍州事提舉常平爲政務寬恕恒以天理民彝爲諭民不忍

欺累遷宗正少卿兼侍講終于家公家居講道四方從遊者皆爲鉅公名士咸淳初寧海葉信公夢鼎以丞相出判慶元修弟子禮嘗謂師門卑陋欲市其隣居充拓之公曰隣里粗安一旦驚擾彼雖勉從我能無媿于心公生平寡嗜欲不好名泊然不知富貴之味或問何以裕後公笑曰吾憂子孫學行不進不患其饑寒也至正續志甬上族望表云又宗室趙氏侍講逢龍之支也

顏制使行鄉飲禮

淳祐六年制帥集撰龍溪顏公頤仲蒐舉舊典增造禮器以人日行禮盍簪酬酢者三千餘人資政殿大學士正奉大夫陳公卓首賓席儀文視前彌煥爲費五萬四千七百七十貫

四明談助

卷十一

二十一

有奇出于府帑禮成制帥賦詩

王春人日喜陰晴文物衣冠萃四明禮樂幾年今一見主賓百拜酒三行人心天理須興起士習民風悉變更太守自慙才德薄綱維全賴老先生寶慶志

黃運判捐軀成塘

黃判官恕字文樸淳熙丙申領轉運判官先是定治北走二舍爲莊北村之新土塘稍北爲武功村之和尙塘有淤蕩界其中相距百餘丈其深莫測修築罔效章大府大醇守郡檄恕董其事垂成屢決每決時其下先有聲水湧如沸有術士告曰是地無物而聲無風而雷龍罔象所宮也投以生人彼畏陽而縮始可成功恕曰修塘所以養民殺人成塘安用塘



爲吾自捐吾軀耳翌日卽其地哀禱少頃復有聲如雷衆皆奔竄恕策馬臨峻崖大呼曰吾死此若輩可奮力語未竟崖崩并馬溺焉役夫求恕屍弗得哭聲震野如命封土越三日塘成忽塘右水湧視之則恕屍也民具衣冠葬之大醇聞于朝勅表其墓

曹志

二賊臣賣友迎降

德祐二年元兵至鄞趙孟傳謝昌元迎降事已見第三卷鰲山袁進士傳中

元慶元路治

元初仍唐宋州治舊制後改都元帥府治

元郡縣建置

四明談助

卷十一

二十二

世祖至元十四年慶元府隸江淮行省十八年改府爲路置總管府二十一年改隸江浙行中書省又置浙東道宣慰司于慶元總州二縣四鄞慈谿奉化州

元貞元年陞

象山定海昌國

州

至元十四年陞

順帝至正十八年方國珍據其地

俱曹志

元治路官制

元陞慶元府爲路其統轄之官有浙東道宣慰司都元帥府設宣慰使都元帥三人同知都元帥一人副使簽都元帥府事二人經歷一人都事二人照磨一人以總七郡兵民之政

初治婺大德七年始徙鄞

其監使之官有浙東海右道肅政廉訪司分司

設副使簽事各一人以糾察吏治其鎮守之官有沿海上萬

戶府

延祐元年改爲縣翼上萬戶府

設達魯花赤上萬戶副萬戶各一人

以鎮壓海徼皆駐節于鄞其治路之官有達魯花赤總管同知治中判官各一人推官二人經歷知事照磨各一人此外復有市舶提舉司海運千戶所都轉運鹽使司分司曹志宣慰司都元帥府治

成宗大德六年因宋郡治置至大二年倭火燬之四年宣慰司廉希哲建至正續志

慶元路總管治

仁宗延祐元年同知張伯延重建在帥府東推官廳在其西經歷司在其東至正續志

慶元路總管府題名記劉基撰

有元誕受天命奄宅四海地大人衆振古莫及皇帝惟生民

四明談助

卷十一

二十三

之休戚繫在司牧乃命大臣嚴簡守令親承親問傳乘如官所于阿殷圖公由江陰監州選爲慶元路總管三年政成而課最朝廷采輿議進公監郡而以前兩浙都轉運鹽使李公思敬代爲總管同寅協恭悉仍舊政會新修府治告完二公乃相謂曰茲郡爲浙東大府跨海爲治帥闔所臨視他郡爲最劇我輩以謏簿首膺重任大懼弗稱以辜上心今幸與民相安可不益思自勵以答天子之寵命乎惟題名古有其制非以爲夸也名之存實必隨之官政之臧否弗逃于民口閭巷之聲悲樂必形焉得其心而祝違之而訕一有所觸其發不可掩天下之情然也使爲政者昭其名于石必有指而祝者否則必有指而訕者祝以爲吾勉訕以爲吾戒勉則力之

戒則改之庶民觀之予日察之近足以爲吾規遠足以爲後人懲且勸則是石庸可廢乎其僚屬咸曰善且非獨二守然也吾屬亦當如之于是自監郡以下至于提控案牘莫不悉鑄其名俾來者又繼于後

成化志

### 石刻古松詩

石延年古松詩石刻舊淪没于平準庫荒棘中後紀至元間府判齊謙移置府治之廳側其詞曰直氣森森恥屈槃鐵衣生澁紫鱗乾影搖千尺龍蛇動聲撼半天風雨寒蒼蘚靜緣離石上絲蘿高附入雲端報言帝室掄才者便作明堂一柱看尙書樓攻媿鑰有跋語云吾鄉郡從事官舍先有籌筆驛石刻慶元己未節推古汴趙師旻字致道又刻此以配之

至正

### 四明談助

#### 卷十一

二十四

續志

### 元賢牧

#### 慶元路治中伯行

伯行系出王呂伯里氏世祖至元二十九年授慶元路治中慶元多宋公相故家時翰林學士王應麟閉門不納客伯行首尊禮開說俾學者師事之吏胥蹂躪士族著片紙叱名立召庭下伯行責吏數罪歲大饑乘驛詣行省言慶元瀕海地隘歲熟猶仰給他郡非官賑給將移徙不便執政然其言爲發粟四萬石歷官至資國院使

清容居士集

萬戶府達魯花赤拜都元帥完者都

萬戶府在明遠橋西

蒙古人泰定中佩金符鎮慶元路沿海萬戶府達魯花赤

剛斷有謀在職二十年營戍鎮靜島寇聞風懾服每祝曰  
小萬戶飛將軍願無再遇也天歷中拜浙東宣慰司都元  
帥前職如故至正五年卒兵民相弔繪像以祭嘉靖志  
浙東宣慰司都元帥泰不花

字達兼由禮部尚書翰林學士出爲台州路達魯花赤以  
招安方國珍陞浙東宣慰司都元帥會國珍復叛不花將  
討之先遣義士王大用往示約信國珍拘大用突入海門  
犯馬鞍等山不花率衆追擊之没于陣死猶僵立不仆投  
屍海中年四十九曹志

慶元路總管苦思丁

文宗至順二年總管飲水食藥殆終一節渠陂修築田無

四明談助

卷十一

二十五

荒蕪嘗監商賦爲設方畧會計適當郡歲漕運米十數萬  
斛筦倉庾者或與漕戶不相謀紛然生事思丁出之如納  
民服其便至正續志

慶元路總管王元恭

字居敬眞定人順帝至元六年總管馭吏有威寬猛相濟  
興學校學廩不給徵逋租贍之舉鄉飲酒禮市地爲義冢  
絕火化之俗作石馬道于江次以便漕運至正二年復成  
四明續志十二卷與延祐志並傳曹志

慶元路總管邱楠

字彥材永嘉人至正中以戶部主事從征方國珍國珍效  
順留楠自輔爲請于朝歷仕慶元路總管竭誠贊畫保障

地方明兵臨城國珍竄入海楠告以天命有歸國珍遂降楠在俘馘高帝素聞其名特命原之

曹志

方國珍叛服無定

元方國珍台之黃巖人身長七尺貌魁梧走及奔馬父伯奇素柔良每爲鄉人所侵蝕輒笑曰吾子當有興者無久苦我旣乃生子五人皆麓豪有膂力黃巖風俗貴賤等分甚嚴佃戶見田主不敢施揖伯奇亦恭田主國珍謂父曰田主亦人耳何恭如此父曰我養汝等田田主之田也何可不恭國珍不悅父卒兄弟戮力家道漸裕恥不禮于田主釀酒以俟田主之至醉其來僕醢其屍于酒甕主家訴于官州遣巡檢來捕國珍左執几捍兵右執巨梃格鬪遂殺巡檢入海爲亂州

四明談助

卷十一

二十六

縣無以塞責妄械齊民以爲國珍黨由是海上益駭亡之國珍所者旬日得數千人至正九年十一月元主命朶兒只班討之國珍引而東元兵追至福建五虎門國珍勢危將焚舟遯而元兵忽自驚擾國珍乘而蹙之執朶兒只班因迫其上招安之狀元主從之用爲定海尉使散其衆國珍雖受命然終不自安復入于海十二年六月國珍攻黃巖元沿海翼百戶尹宗澤戰死江浙左丞孛羅帖木兒率兵討之次于慶元遣元帥泰不華赴溫以圖夾攻旣至值國珍方攻溫泰不華以火筏禦乃引退初孛羅密與泰不華約以六月己未進兵孛羅先期至大閩洋國珍夜率勁卒縱火鼓譟元兵不戰而潰赴海死者過半孛羅及郝萬戶皆被執囚之舟中使求招

安元主慮其爲海道梗復遣使招之國珍兄弟皆登岸羅拜乃散其徒衆收其海舟兵器授國珍萬戶及其兄弟官爵有差十二年春元人方征徐土募舟師北守大江國珍疑爲圖己復入于海泰不華遣兵扼黃巖之澄江仍遣使諭之國珍益疑以小舸二百復突入海門犯馬鞍諸山寨泰不華迎戰死之三月元主復遣江浙左丞答納失里率兵討之十四年元設浙江元帥于慶元以納麟哈喇爲元帥以脩之慶元密邇國珍日夜治鎧仗理舟楫運糧餉項領相望以給軍用又樹柵捍江浚隍築城列弩石楯戟嚴警以防寇至尋復招安之授國珍海道巡防萬戶國璋爲衢州總管兼防海道先是趙士正諸家每與方氏戰子姓多殲于盜不沾元一命而方

氏一再招輒進高官于是上下解體甘心從亂而方氏益橫矣國珍以海內大亂知元國力不支九月以兵突入台州路執元帥也忒迷失黃巖州達魯花赤宋伯顏不花知州趙浩以俟元命遂據有台州先是慶元路蒙古字學錄王剛甫被檄守東門方氏兵憚之不敢登陸者數年剛甫解官去十五年春台旣破慶元民已震恐至是國珍以舟師奄至納麟不能禦城中門開納之國珍入城謁納麟陽尊事之獨慈谿令陳文昭不附執文昭欲沈之于江已乃囚之岱山又攻昌國州達魯花赤高昌帖木兒屢擊破之方氏兵來益衆或勸之遁帖木兒曰是我效死之日也城破力戰而死國珍乘勝取餘姚斥地至上虞與張士誠接境十八年元進國珍爲江浙

行省參政尋令擊張士誠士誠統十將軍以數萬衆禦國珍于崑山海濱國珍乃以舟師五萬攻之七戰皆捷士誠請和乃引還元主嘉其功聽以節鉞鎮浙東開治于鄞俄進太尉江浙左丞賜以衢國公印章昆弟子姪賓客皆至大官雖奴僕亦濫名器二十六年八月金陵兵圍姑蘓國珍屢假貢獻來覘太祖惡其反覆數之不報未幾紹興降于太祖太祖責其貢糧三十萬仍諭以當早效順國珍亦不聽自度兵且至遂爲泛海計是歲元太子遣使賜御酒龍衣于國珍二十七年是爲吳元年姑蘓旣下九月太祖遣大將湯和將兵渡浙江夜八曹娥夷壩通道直抵車厰將逼慶元國珍旣封府庫具民數使城守者出迎王師自挈妻孥以大舶走海中副將

朱亮祖入新昌破天台進趨台州方國瑛棄城拒戰亮祖攻之急國瑛亦以大舶載妻孥走黃巖亮祖遂下諸屬邑十月丙午兵至黃巖國瑛復焚廨宇入于海始國珍登大舶欲揚帆遠引以避兵鋒而輒不利窘迫不知所爲值亮祖各遣人諭使早降國珍遂率其衆宗黨來降且上表曰臣聞天無所不覆地無所不載王者體天法地于人無所不容臣荷陛下覆載生成之德久矣安敢自絕于天地切念臣本唐才處于季世保境安民非有黃屋左纛之念曩者陛下霆轟雷擊至于婺州臣愚以爲天命有在遣子入侍于時固知陛下有今日矣日月中天幸依末造而陛下開誠布公賜以手書歸其質子俾守郡縣如錢鏐故事十年之間與中吳角立皆陛下

之賜也逮天兵下臨吳會臣嘗上書謂朝定杭越暮歸田里不意今年以來老病交攻頓成昏昧而兄弟子姪志慮不齊致煩陛下興問罪之師方懷憂懼未能自明而大軍已至台溫令臣計無所出雖遣使再三而承詔之師勢不能已是以封府庫開城郭以俟王師之至然猶未免爲泛海計者昔孝子于其親也小杖則受大杖則走今日之事適與相類雖然臣一介草莽安敢自絕于天地故每欲面縛待罪闕廷復恐陛下萬一震怒天下後世不謂臣得罪之深將謂陛下不能容臣豈不累天地之大德哉臣謹昧死奉表伏俟嚴誅表文國珍幕官詹鼎之詞也上覽表曰孰謂方氏無人哉是可以活其命矣因趣其入覲至京師上大喜且讓之曰若來何晚

也國珍頓首謝罪上待之特厚每賜宴享與功臣並列方氏旣平其僞官悍將二百餘人素爲民巨害者皆徙江淮台溫慶之民始奠枕焉未幾授國珍廣西左丞仍奉朝請一日侍宴坐不能興輿至家已成末疾矣上數遣中使存問官其子禮爲廣洋衛指揮僉事完爲虎賁所鎮撫姪明謙爲太倉衛指揮僉事上又遣人問所欲言國珍曰臣荷厚恩無尺寸之功而子孫椎魯不知人間事臣所憂者獨此耳幸陛下以臣故曲加保全則臣感恩九泉而犬馬以報陛下矣遂卒年五十六上爲文祭之國珍且死求葬於京城東之玉山上特許之洪武十一年令明謙籍其始從戎者爲兵謂之方氏軍哨凡數萬人而明謙驕不法事覺上怒加以剝膚之刑舉宗受



戮其犀象珠玉金繒之屬多匿于姻家以億萬計皆歸于有司先是黃巖童謠曰楊嶼青出賊精楊嶼素童忽生草木而國珍出竟如謠言

高隱學  
敬止錄

按郎瑛七修類稿云至正八年蔡亂頭剽劫海商方乃爲國宣力勦賊而總管焦鼎納蔡之賄反黜其功方忿曰蔡能亂我不能耶遂與弟國璋等叛學士姚涑作傳亦同蓋無殺田主事

敬止錄

鄞余永麟北牕瑣語亦云方以元政不綱得賊者無功爲賊者獲免遂作亂元不能制不得已降詔撫之遂據台溫明三府而明州爲其巢穴

方國珍鎮四明

元順帝至正十八年方國珍領節鉞來鎮四明

劉德元  
儒學記

十九

四明談助

卷十一

三十

年十月以方國珍爲江浙行省平章政事二十六年以方國珍爲江浙行省左丞相弟國瑛國珉姪明善並爲江浙行省平章政事

元史順  
帝紀

方國珍歸明

至正二十七年九月明兵取台州路時台州溫州慶元三路皆方國珍所據十月明兵取溫州十一月明兵取慶元路十二月方國珍歸于明

元史順  
帝紀

明授方國珍廣西左丞

方國珍黃巖人世以販鹽浮海爲業至正八年與兄國璋弟國瑛國珉聚衆數千人劫運艘梗海道行省參政朶兒只班討之兵敗爲所執脅使請于朝授定海尉尋叛招之降已而

復叛元以海道漕運萬戶招之乃受官尋進行省參政先是國珍兄弟倡亂海上有司憚于用兵一意招撫惟都事劉基以國珍首逆數降數叛不可赦朝議不聽國珍既受官據有慶元溫台之地益強不可制明太祖已取婺州使主簿蔡元剛至慶元國珍遣使奉書請以溫台慶元三郡獻且遣次子關爲質太祖却其質厚賜而遣之國珍名獻三郡實陰持兩端歲歲治海舟爲元漕張士誠粟十餘萬石于京師特以甘言謝太祖絕無內附意吳元年克杭州國珍據境自如惟日夜運珍寶治舟楫爲航海計太祖已破平江南命參政朱亮祖攻台州進克溫州平南將軍湯和以大軍長駟抵慶元國珍率所部遁入海追敗之盤嶼其部將相次降數令人示以

四明談助

卷十一

三十一

順逆國珍乃遣子關奉表乞降太祖覽而憐之遂促之入朝面讓之曰若來得毋晚乎國珍頓首謝授廣西行省左丞食祿不之官數歲卒于京師

明史本傳

國珍又名谷珍蓋降後避明

諱云

明太祖既下婺州方谷珍遣使奉書求降太祖受之然惡其反覆後遣信國公湯和討焉珍遂入海督舟師追之獲送建康太祖問曰谷珍你一向在那裏對曰臣天下無道乘桴浮于海天下有道束帶立于朝太祖喜其言授都督僉事卒於建康後台溫明三府民心未靖太祖以其從子明敏明徹爲總管彼二豎者反生煽惑潛謀不軌遂族之

北窻瑣語

勾餘土音甬上饒歌

沿海城

詩話方國珍倡亂以亡元其於明乍降乍貳而獨得受千步廊之賞邀興王保護何耶予詳攷之則國珍遣其子亞關入朝時具言沿海要害當城築以備患之處浙東旣平遂遣湯信公如其言而行是則其有功于明亦有功于吾鄉者也故表而出之

天台佃田戶倡亂十八載乍降復乍貳妄思蹈窮海乃邀千步廊賞功不可解諒爲亞關疏海防有足采信公雲臺魁來掃紫蛙壘流泉與夕陽洞觀徹真宰聚米得山川捫胸合子亥甬東山越軍遂息海波累功成歸明堂雅歌仍瀟灑

方國珍府第

四明談助

卷十一

三十二

方國珍亂浙東所據爲慶台溫而兼有紹興曹江之東境以通明壩爲地限其用刑甚嚴犯其法者以竹籠籠之投于江明太祖招之國珍約降而不奉朔徘徊持兩端及湯信公以師渡江國珍逃竄入海已而自歸太祖不責前事賞以千步廊百間而國珍子亞關舊嘗在金陵爲質子建言當築城于沿海以防倭太祖詔下信公施行于是始築定海等處十一城皆以亞關之言也國珍父子于元末羣雄爲首亂鼠竊一十八年真人出而爇火息其罪甚巨而吾鄉藩籬之固則亦其父子實啓之不可謂無功其吾鄉府城因元初隳天下城池而壞者雖築于納麟之手而亦至方氏殆完不然嘉靖以後王直徐海之亂荼毒更有不可言者矣國珍所居卽元時

都元帥府也

宋時為慶元府元人始改都府治而移總管之治于東

歸附後為寧波衛

又廓都府之後為內衙有甬道以通前歸附後為安遠驛又取其右為園歸附後為提舉司又立萬戶府于譙樓西歸附後為鎮撫司之獄國珍三弟皆建府易代以來寧波衛已改為巡道治而所謂為驛為司為獄皆廢嗟夫都府在宋時為絕盛有窻曰四明有洞曰桃源有臺曰百花有軒曰叢碧吳履齊諸公之所觴咏也豈意其一變而為桑海之場乎明初羣雄割裂祇國珍以令終既內附有女適沐黔公子在滇中凡鄞人仕滇如左布政履平輩女敦鄉里之誼還往若親戚然則方氏之竊據也所謂盜亦有道者耶羣從勿戢竟殞厥

宗悲夫

結埼亭集外編

四明談助

卷十一

三十三

方氏萬戶府

至正間方國珍據郡治為行省又建萬戶府于譙樓之西北今為鎮撫司

嘉靖志

寧波衛指揮使司

即慶元府治宋為沿海制置司元改都元帥府明初平方國珍改為明州衛指揮使司命指揮駙馬王恭鎮守十四年改為寧波衛設指揮使指揮同知指揮簽事經歷知事及鎮撫千戶副千戶百戶軍職共一百七員

嘉靖志

惟經歷知事為文官餘皆武官子孫世襲寧波衛指揮凡十八家劉萬袁馬臧信魏季陳潘顧王

聞志

按其地今廢為民居即鼓樓北大街左

右也

錢志

明初製銅牌二十面以天下太平年須知中國先萬邦來貢  
日文武各三千編號本衛正官收掌巡夜官軍持此爲號敬止  
錄

高隱學先生于國變後得崇禎間世襲衛官故冊自指揮  
使指揮同知指揮僉事以下至正千戶副千戶正百戶試  
百戶共九十餘家其衛鎮撫所鎮撫有左所右所中所前  
所後所之分聞志言指揮十八家僅記十二姓其所未詳  
者脩載敬止錄明季兵制之變見後條

明承平後旗軍多移以轉運于是守衛者無幾迨嘉靖之末  
倭寇發難現在之軍不足以守禦乃調發狼苗諸兵萬里赴  
鬪其人貪殘成性標掠之慘甚于盜賊故諺曰寧遇倭賊毋

四明談助

卷十一

三十四

遇客兵遇倭猶可避遇兵不得生當事亦患其然于是始設  
浙直總兵建牙蛟關而分巡兵使者亦別召募土人設爲標  
兵永鎮于鄞自是兵制遂一大變而衛所徒有其名厥後召  
募之兵其朽敝亦與旗軍同幸時方無事得少延爾聞志  
附錄指揮諸家遺事已有傳見居第者茲不贅

陳商因渡受賞

鄞十三都陳某洪武末爲商泊于揚子江濱壬午成祖微  
服由鳳陽來遇陳之舟渡江至南京後賞陳渡江功陳求  
官原籍授寧波衛指揮使子孫世襲問中今古錄

潘都事交趾殉難

潘都事裡字誠夫永樂中徵修大典授後軍都督府都事

宣化元年從安遠侯柳升成山侯王通征交趾升恃勝有驕色都事諫不聽會賊再至升出戰忽橋斷軍分而敗都事與升皆死之通脫歸以聞詔徵其子凱爲進賢訓導世免徭役

聞志

### 劉指揮殉倭難

都指揮劉錦嘉靖二年備倭駐定海日本兩島貢使自相讐殺自郡城焚掠出關公倉猝督舟師追勦時村落男女避難入城者絡繹道路公指難民與掌印指揮李震縣令鄭餘慶訣曰百萬生靈在兩君城守錦惟拚一身死賊耳與賊戰于霍山洋自辰至申不解公連發矢斃數賊我舟乘風潮薄賊舟膠不可動已而戰棚陷士卒多墮水死賊

### 四明談助

#### 卷十一

三十五

躍入我舟公揮刀格鬪力竭竟没于海賊亦以創甚遯去

曹志

### 魏指揮世工吟咏

魏安字允恭少讀書長于吟咏世襲寧波衛指揮僉事以其詩法傳子侑是爲雲松先生文學敖雲松先生子也所著有東溟集耆舊傳雲松先生爲甬上耆舊第二集祭酒傳列于屠襄惠公傳後

### 魏氏義犬

魏指揮安嘗殺犬劑藥骨投諸犬一黑犬獨不食啣出抓土埋之其子侑時方成童見而義之口占贊曰犬乎義乎犬其人乎人不犬義人其犬乎

嘉靖志

正統間魏指揮家火然及壁犬撞門若哭主驚起與僕撲滅爲作義犬行云我家有義犬毛色成虎文糠糜撥餒經幾春嚶嚶警夜超凡羣主翁朝出當門守主翁暮歸迎巷口一夕厨頭驚火紅觸戶長號報主翁於乎爾犬猶知豢養恩鄙夫悖德何可言

嘉靖志

### 馬指揮抱憾自剄

寧波衛世襲指揮同知馬瑜娶方氏一日賚酒訪其內兄方湏于城南別墅因止宿是夕自刎于寢門致湏錮獄五年後因坐瑜子鏜郡人冤之蓋瑜有一私事相苦來與商所以解之而不得計無復之也

敬止錄

### 馬都司工詞賦

## 四明談助

### 卷十一

三十六

馬都司斯臧字駿伯世襲指揮駿伯少有才善詩古文詞工書法爲諸生不第始襲職遷揚州都司以忤時宰罷歸嘗作南北兩都賦屠長鄉序之又作中都越都及他賦四卷七起七放二卷演連珠數十首自撰無名公傳高自誇許人以其豪可方湯公讓要亦勳門中一異才也

耆舊傳

### 市舶提舉司

宋元市舶提舉司在姚家巷不在此

在寧波衛後卽宋郡治後園元爲方國珍花廳明永樂元年設市舶提舉司

嘉靖志

市舶司設提舉一員副提舉五員屬下有司吏典吏祇禁弓兵工脚庫子秤子合干人行人之目

敬止

錄

### 市舶司興廢

明太祖洪武初海外諸國入貢許載附方物與中國貿易設市舶司提舉官以領之寧波通日本其貢以十年爲期以金葉勘合表文爲驗以防詐僞後市舶司暫罷輒嚴禁瀕海居民私通海外諸國明史食貨志英宗正統四年五月倭船四十艘破寧波大嵩千戶所大肆殺掠世宗嘉靖二年五月日本貢使宗設與宋素卿互爭眞僞與之鬪殺後獄成論死明史日本傳是年給事中夏言言倭患起于市舶遂罷之明史食貨志

### 安遠驛

成祖永樂三年以諸蕃貢使益多乃置驛于市舶司以館之浙江曰安遠明史食貨志安遠驛在寧波衛後卽今海道司爲方國珍遺屋永樂元年設市舶司于此四年復改爲驛設驛丞

### 四明談助

#### 卷十一

三十七

一員吏一名館夫二十名敬止錄

### 明初通使東夷

洪武初太祖謂廷臣曰東夷固非北胡腹心之患亦猶蚊蚋警寤自覺不寧與誠意伯劉基等議其俗尙禪教宜遣高僧說之歸順乃選明州天寧寺僧祖闡南京瓦罐寺僧無逸往使日本宣諭勅旨隨遣夷僧來獻馬匹盔鎧鎗刀瑪瑙硫黃

帖金扇諸物敬止錄

十五年使臣歸廷用來貢脩倭指揮林賢交通樞密使胡惟庸計擒遣還夷使誣爲寇盜私其貨物中書省舉奏其罪流賢日本十六年六月夷船十八隻寇金鄉小濩寨官兵敵却之十七年胡惟庸僞差廬州人李旺光宣使以還林賢率倭



兵四百餘人與僧如瑤來獻巨燭中藏火藥兵器圖謀亂逆比至惟庸被誅朝廷治其逆黨處賢極刑夷兵發雲南守禦降詔切責倭國君臣

敬止錄

倭使鬪殺焚掠

武宗正德五年日本遣使臣宋素卿來貢時劉瑾竊柄納其黃金千兩賜飛魚服前所未有也素卿鄞縣朱氏子名縞幼習歌唱倭使一見悅之而縞叔澄負其直因以縞償至是充正使至蘇州澄與相見後事覺法當死瑾庇之謂澄已自首並獲免世宗嘉靖二年五月日本貢使宗設抵寧波未幾素卿偕瑞佐復至互爭真僞素卿賄市舶太監賴恩宴時坐素卿于宗設上船後至又先爲驗發宗設怒與之鬪殺瑞佐焚

四明談助

卷十一

三十八

其舟追素卿至紹興城下素卿竄匿他所免凶黨還寧波所過焚掠執指揮袁璫奪船出海巡按御史歐珠以聞會宗設黨中林望古多羅逸出之舟爲暴風飄至朝鮮朝鮮人執二賊以獻給事中夏言因請逮赴浙江會所司與素卿雜治至四年獄成素鄉及中林望古多羅並論死繫獄久之皆瘐死

明史日本傳

北牕瑣語朱縞作朱杲世居靈門家貨骨董爲業日本貢使宗設作夷酋元永春充正使與此稍異

汪直等誘倭入寇

嘉靖二十六年十二月倭犯寧台二郡三十二年海盜汪直勾諸倭大舉入寇浙東西同時告警初浙江設市舶提舉司以中官主之駐寧波海舶至則平其直制馭之權在上及世

宗檄天下鎮守中官并撤市舶濱海奸人遂操其利初市猶商主之及嚴通番之禁遂移之貴官家負其直者愈甚倭喪其貲不得返已大恨而大奸若汪直徐海陳東麻葉輩以內地不得逞悉逸海島爲主謀誘之入寇海中巨盜遂襲倭服飾旂號分艘掠內地無不大利故倭患日劇三十五年總督胡宗憲請遣使諭日本國王禁戢島寇招還通番奸商許立功免罪既得旨遂遣寧波諸生蔣洲陳可願往明史日本傳三十

六年蔣洲在倭中諭山口豐後二島主源義長源義鎮還被掠人口具方物入貢將洲事詳蔣家園本傳宗憲以聞詔厚賚其使遣

還四十年九月宗憲奏言賊屢犯寧台溫我師前後俘斬一

千四百有奇賊悉蕩平明史胡宗憲傳

四明談助

卷十一

三十九

俞戚大帥平倭亂

俞總兵大猷由泉州衛世職官海南叅將時倭寇猖獗大猷條上方畧謂當用閩中樓船爲長技總督王抒從之王直據烈港大猷連敗之于松門普陀烈港昌國臨山觀海諸處擒斬四千溺死無算直遂遠遁以功陞總兵官鎮守浙直時舟山賊積歲不下大猷密遣裨將張四維用火攻襲之斬首百餘級新倭入沈家門水師遇之俘五十餘又戰小姑渡斬首二百四十級大猷精術好謀持重軍屯秋毫無犯民甚德之

曹志

戚總兵繼光由登州衛世職官浙江都司會倭寇浙東補叅將守定海繼光多將畧上練兵議謂用義烏人一旅可當三

軍督府從之以南方不利長驅乃間長短兵夾振而進立隊長偏兩之法攻距擊刺互用名鴛鴦陣倭望見旌旗卽辟易所向取勝後爲薊鎮時攜以自隨南兵之名聞天下曹志

蔣宗信傳後論

南雷文定

余讀茅鹿門紀勦徐海本末以爲倭之入寇皆由徐海故曲折其反覆儉狷之術以著平倭之要領獨不念徐海爲汪直之餘黨直苟無歸命之心則海必不受我之籠絡縱使滅一海而爲海者皆是亦安得盡施其鈐鍵乎鹿門但侈脅從之治而薄折首之勳不已悖乎宗信致直解東南之厄而身填牢戶此與陳湯斬郅支而下獄亦復何殊然陳湯身没而名彰宗信姓名曾不得與俞戚大帥之徒隸齒豈古今之時異

四明談助

卷十一

四十

歟其後沈惟敬之使關白垂成而敗身死猶爲僨事者委過成則爲宗信敗則爲惟敬無怪天下之樂爲首施也

蔣宗信傳見前

第九卷蔣家園下

巡視海道司

嘉靖中以市舶提舉司改巡視海道司中爲正廳前爲露臺上有重屋廳之東爲來鳳亭西爲山池亭館露臺前爲儀門門之東爲迎賓館爲射圃爲箭廳又前爲大門

嘉靖志

今爲海

道公署

錢志

崇禎六年海道向鼎新建迎賓館鄞令蘭陵王章爲記

周禮云班朝治軍蒞官行法非禮則威嚴不行故弧矢之利以威天下然出征必釋奠歸至必御賓明賓軍五禮未嘗不

相需爲用也若寧文獻蔚起冠蓋相望凡遇海濱大因革周  
行指示自憲節以下無不造膝承之敢委嘉會于草莽乎海  
道司之有寅賓館禮也至湫隘而迫于門廡之旁則儉不中  
禮也幸勅兵使者西蜀向公以霹靂才渙雲雷手汰兵兵勁  
清餉餉足簡器器銳督船船堅期月之間百廢具起一日進  
屬員于階下而周詢故實曰昔姬公朝讀書百篇夕見七十  
二士鄭僑不以館垣勿戒致失隣諸侯歡卽武侯治蜀下及  
井灶罔不修葺况海波未盡消弭上策必折節一二賢豪以  
勸不逮今徐榻虛懸偃室塵滿雖鄙陋無足承下風其如桑  
梓之愛何會轅門舊有射圃荆棘叢生卽命縣官剪萊捐鏹  
庀材規創三楹前後軒敞入徑繞以朱欄檻外有古梅壽柏

四明談助

卷十一

四十一

森然挺立暑月呼風猶帶霜氣落成之日適與榮遷相邁有  
以蛟島澄清銘者有以燕然勒石頌者有以文武憲邦運籌  
制勝箋記者公愾然曰非吾志也吾所奉以周旋者惟禮而  
已單父之治師事友事數輩豈從事名邦敢褻典禮夢寐之  
間覺局脊久矣茲館告成庶可藉于賢郡邑以免一人罪戾  
乎臨保之恭卽步伐之肅獻馘先聲不于昌言交集耶登茲  
堂者無忘經始

明賢觀察

楊使君瑄

字廷獻豐城人景泰進士以副使分巡海道軍官多放縱  
戍卒公立五日一操法復奏增督糧通判一員絕勢豪保

攬之弊凡城隍墩埃甲兵皆以時葺成化十三年春有報倭船數百將犯定海者公時在杭寮采有懼色公曰彼果來吾盡誅之耳尋至郡守令已呼民壯授甲矣公以海上甲兵自足農事方殷亟散遣之閱數日乃知倭兩船八貢者也人服其智量

嘉靖志

盧副使若騰

字閑之同安人崇禎四年進士授寧紹海道僉事剔奸弊抑勢豪風裁凜然郡東郭江畔爲商賈輻輳地細民有蓋厥貿易者豪紳勒取其稅公禁絕之諸豪奴詐取民財捕至庭下重笞之一奴著綾袴公拍案揭裳示之曰我居官止一布袴若人奴乃侈暴至此加笞焉十六年胡乘龍倡

四明談助

卷十一

四十二

亂雪竇公與知府陸自嶽虛懷咨度旬日間渠魁授首閭

井晏然

李志

國朝海道副使王爾祿

字天錫號念尼保定人明季舊臣順治己丑來任海道副使迄癸巳數載間除害賑饑禮士卹民立倉置田仕終刑部左侍郎崇祀名宦著麻姑洞主人詩文集懷社同聲集不二真詮明州賑饑紀事救荒錄卹貧錄輯刻保陽張氏殉難錄聞子鑑湖七觀

聞志

陳觀察中孚

字心畬湖北武昌人嘉慶六年進士二十三年由翰林出任寧紹台道凡有善政無不興舉而尤留心水利以城中

水道日久淤塞欲照宋時舊志開復自西南二門入城至東門出城落江皆估工開闢浚深不以擾民凡民間捐錢讓地無不踴躍從事公嘗月夜乘小舟徧閱見河棚雖禁絕而過路小橋累多褻衣穢物難通客舟欲盡毀河灘小屋開復舊界局中告以工已將成擾民不便遂止月湖書院生童課業向有膏火花紅公爲之增益郡中永濟堂殷戶設局以濟寡婦之乏食者資費不足公捐俸首助屬下遂各捐助并出示勸捐于奉化育嬰堂亦然公有鈔關舊例銀八千皆于公事用之不入私橐蒞任四載陞廣東按察司

協佑侯廟

四明談助

卷十一

四十三

在舊府治後門臨府西河之東上橋祀宋封雲霄檢察使沙誠舊在北郭武烈侯劉公廟右里人迎祀于此

聞志

宋惠民藥局

寶慶三年所創在郡圃射埭西地逼隘非便先是犒軍賞庫

酒庫

有樓曰海晏後改爲參議官舍樓棄不居寶祐間判府吳

潛卽樓爲局置子鋪一十四所

開慶續志

四明談助卷十二

府山脉自府治西至府西河等蹟錄竟茲再從府西河轉北過東至鹽倉門河止其上有舊貢院倪園野秀園張尙書第郡學宮所有事物詩歌並詳于後

宋貢士院

舊志云宋貢院在郡學西以地圖擬之當在郡學之正西舊府治後今爲倪氏徐氏之居三面距河北有四港橋東北有橋無名聞志所稱鬻河之貢院橋當移名于是

宋時貢舉

後附明制

熙寧中行三舍法武學附選有圃以習射宣和罷舍法復科舉三歲一試解一十二名紹興二十六年兼西北流寓通解

四明談助

卷十二

一

一十四名舊無貢院士亦不過數百率寓試于行衙又于府學西妙音院院爲之廢 建炎四年燬于兵士寓試于譙樓之上或于開元寺試者日衆乾道五年守張津始卽妙音院廢地建院以容之靡金錢一千萬東西重廊凡一百四十楹立聽事于其北位考官于其後執事之舍悉脩侍御王伯庠爲記其後又不足以容有司每借府學之冷齋以居之 嘉定六年提刑程覃攝守葺治之南增屋數十間作彌封膳錄所又于學地立牆以障之限隔始嚴 端平元年被旨增解額一十四名賦十名 經四名通前共二十八名寶志慶明時考試多于公署縣試儒童或于寧波衛或于小教場令自搭蓬舍郡縣科試生員及季試觀風多于按察分司提學按臨則察院行

臺架廠縣有常費敬止

貢士院浚井滅怪

宋貢士院在學宮西周密癸辛雜識云乙卯歲先子守鄞江以貢士院敝甚遂一新之院內舊有土神七姑廟在焉先子素剛介併欲撤去且命鑿井二以便汲既而得泉皆汙濁不堪用監守判官周頡及吏魁賴良者曰土人廟貌已久州人賴之今既與院中無所妨欲姑存之先子漫答云神若能令二井清冷則可官吏因往白太守語次日落成吏欣然走告曰井水已可食矣試命汲之清冷佳泉也于是併爲葺其祠焉

元織染局

四明談助

卷十二

二

在學宮西係宋貢院基至元二十九年起局泰定二年縣尹

阮申之改建

至正續志

介石園倪氏

卽今桂芳第

甬上族望表介石園倪氏世系見烏春艸集明思宗以前不甚顯殉難建寧僉事懋喜大理評事元楷二望建寧兵脩道僉事倪公懋喜

大理評事倪公元楷

倪氏自宋已居鄞顧不甚達至元末以貲雄於時因爲方國珍所連綴有爲之參政者入明遂充衛籍歷三百年仍未達及錢忠介公軍起倪氏子弟從之一爲懋喜字仲晦卽僉事也一爲元楷字端卿卽後官評事者也乙酉之夏



浙東內附定海總兵王之仁者繳印仍故任會鄞人擁忠介舉事降臣謝三賓惡之貽千金于之仁令其以兵來殺諸首事忠介公欲貽書之仁而難其使公請行遂以忠介書往甫至定人洶洶言昨有陳秀才上箋大將軍詆其降而大將軍殺之聞之股栗俄而三賓之使繼至公神色不動有頃之仁召公曰君此來大有膽公曰大將軍世受國恩賢兄常侍攀髯死國天下所具瞻方今人心思漢東海鎖鑰大將軍之任也之仁搖手曰好爲之且勿洩謝使入見待之畧同但曰以十五日至鄞共議之謝使出乃遣公歸之仁曰語錢公當具犒師之禮翌日之仁至果脅三賓出兵餉萬金與忠介忠介勞公曰此李抱眞之招王武俊

也而君以三寸舌成之功過之矣及畫江守定以公爲職方參瓜里軍唐魯爭頒詔之禮議募一能者乃以公往果稱旨閩中留之令以僉事分守建寧時鄭芝龍盡取閩中兵餉歸于所屯之東石至是一空公捐俸爲餉以募兵大兵攻建寧出鬪力不支一軍盡歿丙戌八月十一也評事與公同起義江上事去歸家不肯薙髮幅巾自如然杜門而居外人未之知也一日監司試士夜半唱名呼士入評事暗中竊往視之有仇家見其髮鬢鬢然遂首于官下獄論死評事忼慨坐囚中與華公過宜李公昭武高歌木公不屈魔鬼一曲聲撼獄壁時評事尚有母在堂遣人以酒八獄飲評事至大醉熟睡盡薙其髮醒而始覺痛哭欲

自裁旁人以母命止之得免歎曰吾竟不得與仲晦白首同歸也其荼苦艱貞亦足與公配嗚呼倪氏于明雖衣冠遜于楊張屠陸而國亡之後其見錄于文山幕府列傳者有二人焉足以重其族望矣

結埼亭集  
墓版文

方唐魯二藩不協時募能使閩者錢忠介公薦僉事僉事至則告王曰方今閩強越弱然無越則閩無所蔽且均爲太祖子孫乃區區爭虛號耶唐王喜留之建寧兵敗没于陣評事工書法善詩毛監軍象來爲西臬六子之集評事爲之渠高武部宇泰爲南湖九子之社評事亦預焉落落穆穆不輕言笑在諸遺民中最爲孤冷浮屠槩山居白衣寺與評事艸堂近朝夕過從庚申孟夏病甚夢現金塔化

四明談助

卷十二

四

爲白蓮次日卒有白蓮集

續者  
舊傳

今倪氏子孫僅存數人一在水氏悠園種菜以餬口甲戌十月曾見萬戶父子小影豐頰微鬚衣冠古雅上有遂初老人黃晉卿題詞數百年遺迹雖赤貧猶能珍藏亦不失爲賢子孫也

句餘土音甬上薤露詞

歌木公

倪大理坐囚

詩話倪評事端卿同錢太保起甬上軍潰以不肯剃髮被囚與華職方連牀歌木公不肯屈魔鬼音節嘹嘒木公不造遇魔君負眞鋼詎可磷彼少卿慚循髮應無面歸禁闥我飾巾久將盡以死殉非所吝呼好友歌木公請

看白日貫長虹

同族祥爨順治壬辰進士知縣 懋圻順治間副貢

可法康熙癸巳舉人 朝源乾隆乙丑進士陽符知縣

選舉表

道後徐

徐氏自稱先世居黃巖竹篩村明洪武時台州方氏歸順隨之至鄞遷居于此世襲指揮百戶卽倪氏之舊居大半歸于徐氏今稱道後徐代有科貢族亦繁盛

徐處士大器

字子才號待庵幼失怙卽爲仲父後念生母鄭暨繼母陳俱以弱齡苦節孝養備至孺慕之懷數十年如一日居兩

四明談助

卷十二

五

母喪哀毀盡禮中年喪偶不再娶長兄大中謙謹端方事之如父晚歲與兄同營葬域于北雪曰庶得與兄時刻相依也其天性孝友類如此值明季兵燹謝絕舉子業一意肆力詩古文生平篤姻誼重然諾好施與里有無賴李姓者鬻妻于營兵後將攜之北去見李痛楚號泣遂慨然出二十金贖之至今猶咸頌盛德云子兆書涵暘孫國賓俱登賢書

涵賜康熙壬午舉人 國賓康熙乙酉副貢 兆星康

熙戊子歲貢 兆書康熙癸巳舉人 國標雍正戊申

歲貢 樹櫛乾隆壬午舉人 選舉表 汝模乾隆庚戌歲

貢 一鯨乾隆壬子歲貢湖州府學訓導

袁狀元第

鑒橋之西嘉定甲戌狀元兵部尚書袁甫所居有狀元坊

聞志

宋嘉定進士李韶調慶元教授袁燮求學宮射圃益其居不與燮以是益敬之見宋史本傳據此則袁第當在郡學之西明季張尚書府前

秀野園

袁正獻公宅與學宮爲鄰有直清亭是亦樓又作願豐樓樓之左右前後有山有水有竹有花其地二畝有奇名之曰是亦園又稍廣之曰秀野園見絜齋集是亦樓

開禧間正獻公建小樓于廬東以自娛有記見絜齋集

袁氏譜

四明談助

卷十二

六

絜齋先生作樓名以是亦曰直不高大耳是亦樓也王深寧採其言于困學紀聞全謝山謂是亦樓在城南亦有記今錄其記于城南書院後

袁正獻之先居長春門外故族望表稱城南袁氏至正獻正肅二公始居城中鑒橋見九靈山房集茲錄正獻以下諸傳其自光祿大夫穀以下至正獻之父文諸傳仍列于城南袁氏下

據慈溪竹江袁氏譜云鑒橋在府治東北半里舊爲穀公燮公甫公之故居號稱袁府後以其地卑府學子姓別遷焉見府志而族望表稱光祿以下爲城南袁氏戴九靈稱絜齋蒙齋二先生爲鑒橋袁氏知竹江之譜有誤

禮部侍郎兼侍讀袁正獻公燮

字和叔光祿韞之元孫生而端粹專靜乳媪置槃水其前  
玩視終日夜臥常醒少長讀東都黨錮傳慨然以名節自  
期入太學見陸象山九齡遂師事之同郡沈叔晦煥楊敬仲

簡舒元質璘皆聚于學朝夕以道義切磨登淳熙八年進

士調江陰尉浙西大饑常平使羅點屬任賑卹公命每保  
畫一圖田疇山水道路悉載之而以居民分布其間凡名  
數治業悉書之合保爲都合都爲鄉合鄉爲縣征發爭訟  
追胥披圖可立決以此爲荒政首寧宗卽位以太學正召  
值朱晦庵諸儒相次去國公亦以論去自是黨禁興矣嘉  
定初召爲司封郎官因對言陛下卽位之初委任賢相正

四明談助

卷十二

七

士鱗集而竊威權者從旁睨之彭龜年顯言其奸以罪而  
去權臣遂根據幾危社稷陛下追思龜年之忠蓋嘗臨朝  
太息矣今正人端士不乏願陛下常存此心一龜年雖沒  
衆龜年繼進天下何憂不治臣昨勸陛下勤于好問而聖  
訓有曰問則明臣與朝士言之莫不稱善而側聽十旬陛  
下之端拱淵默猶昔也夫旣知如是而明則當知反是而  
闇是非得失懵然不辨矣除禮部侍郎兼侍讀時史彌遠  
主和公爭之益力臺諫劾罷之遂奉祠以歸成就後學甚  
衆學者稱絜齋先生後諡正獻宋史本傳長子喬鄉貢進士官  
溧陽令次子肅慶元五年進士官江州牧三子卽正肅公  
甫少子商嘉定十六年進士官閣學孫衡寶慶三年進士

袁氏  
譜

嘉定間金寇交攻廷臣有以和戰守三策爲言者時侍郎胡榘專主和議會入朝四明袁侍郎燮與胡廷諍專主戰守以笏擊胡額遂下臺諫集議以此辭歸太學諸生作詩送之曰天眷頻年惜掛冠誰令今日遠長安舉幡莫遂諸生願祖帳應多行路難去草豈知因害稼彈烏何事却驚鸞韓非老子還同傳憑仗時人品藻看宋張仲文白獺髓

四明文獻鈔云正獻立朝守正不阿議者指爲好名遂奉祠以歸著述不倦曰吾以此爲笙鏞管磬不知其勞也終于顯謨閣學士所著有絜齋集五十卷 四明文獻志董山贊云學主存心教先忠信植德忤奸再黜無愠恬然著

四明談助

卷十二

八

述樂比笙鏞絜齋正獻稱諡俱崇

袁正獻著述書目

絜齋家塾書鈔十卷 毛詩經筵講義四卷 高宗寶訓

七十卷 孝宗寶訓六十卷 絜齋集二十六卷 後集

十三卷 象山年譜一卷分上下

四庫全書簡明目錄云袁絜齋集二十六卷後集十三卷原本久佚今從永樂大典錄出絜齋亦傳金溪之學而較楊敬仲爲篤實其文淳樸質直不事雕繪而剖析義理敷陳政事皆剴切詳明詩則具體而已

絜齋家塾書鈔後序節 蒙齋集

甫自幼泊長侍先君子側平旦集諸生及諸子危坐說書

夜再講率至二鼓無倦容謂學問大旨在明本心吾之本  
心卽古聖之心卽天地之心卽天下萬世之心彼昏不知  
如夢如醉一日豁然清明洞徹聖人卽我我卽聖人舜號  
泣旻天負罪引慝祇見瞽瞍禹荒度土功三過家門呱呱  
弗子道心精一曾何間斷自古大聖同此一心又言見象  
山先生讀康誥有所感悟反己切責若無所容讀呂刑歎  
曰從肺腑中流出嗚呼至哉先君子之學源自象山明白  
光粹無一瑕疵可謂不失本心矣是編也伯兄手抄雖非  
全書然發揮本心大旨具在伯兄名喬天資純正用志勤  
篤嘗宰溧陽視民猶子邑人德之惜未盡行所學耳甫悼  
先君子之歿幸伯兄之有傳今又云亡痛曷有已遂刻是

四明談助

卷十二

九

編名曰絜齋家塾書抄而納諸象山書院以與世世學者  
共之紹定四年良月己未男甫謹書

知江州袁公肅

字廣敬正獻公仲子慶元五年進士嘉定壬午爲餘姚令

越歲甲申展鳳皇山充公墓

充爲吳越王錢俶書記宋初  
避禍隱居慈溪之剡壘卒葬

鳳皇山

東歸過竹渡善其地買田一方將卜居焉理宗時遷

江州觀察推官先是弟甫與史嵩之爭和議不合出知江  
州御史王遂等力爭乃與肅江州而改甫知衢州迨江州  
歸分區建宇因其有四子各立一區後俱廢惟次子復公

系存爲竹渡始祖也

竹江袁  
氏譜

少傅兵部尚書袁正肅公甫

字廣微正獻公燮之三子嘉定七年進士第一授秘書省正字遷校書郎言邊事之病不在外而在內偷安之根不去規模終不立壅蔽之根不去血脉終不通忌嫉之根不去將帥終不可擇欺誕之根不去兵財終不可治祖宗之御天政事雖委中書然必擇風采著聞者爲臺諫敢于論駁者爲給舍所以緝官邪肅朝綱也今日誠體是意以行之可無偷安壅閉者矣出通判湖州遭父憂服除知衢州提舉江東常平前後持節江東五年所活無算遷起居舍人兼崇政殿說書于經筵奏剛之一言最切于陛下陛下徒有慕漢宣吏治之名乃更墮元帝文宗柔弱不振之失總由不識剛德之眞所謂眞剛者當爲必行不當爲則斷

在勿行時相鄭清之以國用不足履畝使輸券嘗講罷帝問近事公奏惟履畝事人心最不悅適講漢高八關辭秦民牛酒民俱大悅今日橫科若此民心喜乎怒乎本朝立國以仁爲本陛下此舉仁乎否乎帝爲惻然嘉熙元年遷中書舍人入見帝問邊事甫奏當以上流爲急和議恐誤事又奏脩邊四事至爲詳明權兵部尙書暫兼吏部尙書致仕卒于家贈少傅諡正肅公居官切于愛民所至有惠政立朝正色無所阿附王深寧先生謂近日科名有益世道者惟公一人而已所著蒙齋文集行于世

詳耆舊傳

四明文獻鈔云正肅少服庭訓長從楊文元公慨然以斯道自任時朱陸之學各立黨與先生曰道一而已和而不



同乃所以爲同也道無終窮先賢之切磋有不同者將歸于一未始不同也嘗云吾觀艸木之發生禽鳥之和鳴與我心契其樂無涯耳

袁正肅著述書目

中庸詳說二卷 孟子解 孝經說三卷 防拓錄 江東荒政錄 信安志 講學語錄 樂事錄 蒙齋集二十冊 蒙齋續集八冊 後省封駁

袁處士哀

字德平正肅公甫之孫年二十宋亡與族人桷私議曰官族久當圯宜爲傳遠計遂各盡晝夜鈎思探索考閩蜀東浙永嘉湖南江西之學合其異同以輯言行詩益溫雅以

四明談助

卷十二

十一

安定書院山長授海鹽州教授未拜一夕夢游南岳署已判官不旬日而卒有臥雪齋文集

清容集墓表

處士善書法嘗

撰書學集要亦工詩隱居沙家山不出與文清公爲族兄弟嘗因游東湖作聯句千餘言而其餘詩失傳亦足歎也

甬上耆舊傳

殉難張尚書故第

在大人堂東首隔河門對府學射圃尚書本雍睦堂張氏知靖安縣伯庠之後其雍睦堂祖居在西臬見臬堂文鈔後徙于寶奎里至尚書之父分居于此屋已爲墟門前旗桿夾石鼓故蹟尚存

張刑部圭章

字兩如天啓四年舉人官刑部員外郎判河東鹽運致仕  
爲人嚴毅正直處鄉族皆有恩德晚年變值滄桑其子絕  
裾而去乃自慰曰不負生平讀書也由是室廬盡傾簞瓢  
不繼處之怡然年七十餘卒無以爲殯鄉人重義者卽其  
先墓之在南郊祖關者祔葬焉

聞志

兵部尙書張忠烈公煌言

字元箸別號蒼水鄞縣西北廂人也父圭章刑部員外郎  
太夫人趙氏感異夢而生公公神骨清勁跣跣不羈喜呼  
盧無以償博進則私賣其生產刑部怒伊戚全公美樟號  
穆翁者善鑒曰此異人也乃以其田售之得金三百爲清  
其逋而勸以折節讀書時莊烈帝以天下多故命主考官

四明談助

卷十二

十二

于試文之後校射公三發皆破的舉崇禎壬午鄉試錢忠  
介公之起兵也公先至卽遣公迎魯王于天台王授公爲  
行人魯王至會稽賜進士加編修閩中頒詔之使至議開  
讀禮張公國維與熊公汝霖爲一議朱公大典與忠介爲  
一議公出揭以爲當如張公之言固請自充報使入閩以  
釋二國之嫌王從之及自閩還累有建白不見用江干之  
破也公泛海入翁州道逢富平將軍張名振扈王入閩公  
從之旣至招討使鄭成功以前頒詔之隙修寓公之敬于  
王而不爲用公勸名振還石浦招散亡以謀再舉乃偕還  
王加公右僉都御史時威鹵侯黃斌卿守翁州名振以石  
浦之軍與爲犄角明年松江提督吳勝兆請以所部來歸

斌卿心不欲往而故都御史沈公廷揚御史馮公京第與公並勸名振應之遂監其軍以行至崇明大風覆舟沈公死之公與名振皆被執有百夫長者識公導之使走七日間道復歸翁州時忠介已奉王出師于閩浙東之山寨亦羣起遙應之公乃集義于上虞之平岡因糧于民履畝輸賦餘無及焉庚寅閩師潰諸將以王保翁州名振當國召公以所部入衛加兵部右侍郎兼官如故辛卯 大兵破翁州公復以兵奉魯王入閩次鷺門時鄭成功兵最強自以唐王舊臣不肯奉魯公亦稍籠絡之冀收其用嘗曰招討始終爲唐真純臣也成功聞之亦曰侍郎始終爲魯豈與吾異趨哉故成功與公所奉不同而其交甚睦癸巳冬

復間行入吳淞尋招兵于天台次于翁州明年軍于吳淞會名振之師入長江趨丹陽掠丹徒登金山望石頭城遙祭孝陵三軍慟哭失聲烽火逮江寧時上游故有宿約而失期不至左次崇明甲午再入長江掠瓜州而所期終不至復東下駐翁州是年名振卒遺言以所部付公自公平岡入衛之後部下不滿三百至是始盛乙未成功貽書于公謀大舉丙申公軍于天台丁酉 大兵遷翁州之民公還軍翁州時桂王在滇南王去監國號通表滇南戊戌滇南遣使加公兵部左侍郎兼翰林院學士明年五月成功會公于天台悉師以行師次崇明公曰崇沙江海之門戶也有懸洲可守不若先定之以爲老營倘有疎虞進退可

依也不聽而請公以所部爲前軍向瓜州時 大兵于金焦間以鐵鎖橫江所謂滾江龍也譚家洲岸皆西洋大礮而公孤軍出入其間令善泅者斷滾江龍而支軍進奪譚家洲礮相約既定公卽進踞上流奪其木城以夾擊之然舟多應礮而沒不得前公登舵樓焚香祝天飛火夾船而墮遂以十七舟竟渡公渡而譚家洲守礮者亦走木城俱潰明日成功始至攻城克之議師所向公請成功先取鎮江成功恐江寧之來援也公曰吾但以偏師水道薄觀音門彼將自守不暇何援之爲成功卽請公行未至儀真五十里士民迎降六月二十七日成功來告鎮江之捷公兼程抵觀音門致書成功請以步卒陸行赴白下不意成功

卒以水道來于是守城者嚴備已具七月四日成功水師方至次日公所遣別將以蕪湖降書至公頗以成功年少恃功爲憂欲留軍中與之共下江寧而成功以蕪湖爲江楚要道請公往扼之公辭之不得乃至蕪湖相度形勢布列四營以控扼上下大江南北相率來歸者三十餘城初公之至蕪也軍不滿千船不滿百但以大義感召人心而公師所至禁止抄掠父老爭出持牛酒犒師望見衣冠涕泗交下以爲十五年來所未見瀕江小艇載果蔬來貿易者如織公所至城邑入謁先聖遺臣故老角巾抗禮撫慰懇至守令則青衣待罪考其政績而去留之遠方豪傑延問策畫勉以同仇多有訂師期而去者日不暇給于是徽

州降使方上謁而江寧之敗問至初公貽成功書以師老易生他變宜遣諸將分取句容丹陽諸城邑如白下出援則首尾夾擊之如其自守則堅壁以待成功謂城可旦夕下雖有遣水師提督羅蘊章招撫吳會之命而未卽行但命八十三營牽連立屯安設雲梯地雷并造木柵而蘓松總兵梁化鳳等以馬步兵相繼至浙之駐防兵亦來援長驅入城莫之遏者前鋒將余新銳而輕士卒樵蘓四出營壘一空化鳳諜知之以輕騎襲破前屯擒新以去成功倉卒移帳質明軍灶未就而大兵傾城而出諸營瓦解成功之良將甘輝亦以馬蹶被擒死之軍遂大崩初議取崇沙甘輝之言與公合及議遏蘓常援兵輝言亦與公合而

成功皆不聽以致敗公之聞信也以爲雖敗未必遽登舟雖登舟未必遽揚帆雖揚帆亦必入鎮江以圖再舉故彈壓列城秘不使諸將知而更貽成功書以爲勝負兵家之常乞益百艘以相助不知成功并撤鎮江之師竟入海先是鎮江之捷其自巡撫而下皆欲出走故公勸成功持久以觀變旣不得請公與諸將議以下流已梗而九江一帶尙未知我之敗我麾下已萬餘前此豪傑來見者又多成約不如直趨鄱陽招集故楊萬諸家子弟以號召江楚八月七日次銅陵與大兵之援白下者遇公奮擊敗之沈其四舟是夕大兵以不利引而東下礮聲轟然而公軍誤以爲來劫軍遂潰或勸公入焦湖慈谿義士魏耕遮道

說公以爲焦湖入冬水涸不可駐軍而英霍山寨尚多耕  
皆識其魁請入說之使迎公乃焚舟登陸士卒願從者尚  
數百人十七日入霍山而霍山寨已授撫不肯納乃次英  
山甫度東溪嶺而追至士卒分竄相依止一童一卒迷失  
道路土人爲導變服夜行天明而踪跡者多導者脫身去  
又以賂解散諸踪跡者然而茫然不知所之念有故人賣  
藥于安慶之高河至則故人適他出而其友識公遂導公  
由樅陽出渡江至休寧買棹入嚴陵又恐浙人之多識之  
也改而山行自東陽義烏以出天台人謂是役也以視文  
丞相空坑之逃其險十倍過之而其歸則郭令公之再至  
河中也遂駐節天台故部漸集成功聞公還亦喜遣兵來

助公巡視天台有長亭鄉者多田而苦潮乃募諸義兵築  
塘以捍之至今猶蒙其利乃遣人告敗于滇中且引咎滇  
中賜公專勅慰問加官尚書兼官如故明年移師林門尋  
軍于桃渚時成功以喪敗之餘思取臺灣以休士公聞之  
不喜辛丑引軍入閩次于沙關成功已抵澎湖公遣幕客  
羅子木以書挽成功成功不聽成功雖東下而 大兵懼  
其招煽沿海之民于是有遷界之役沿海之民不願遷  
大兵以威脅之公乃復以書招成功謂可乘此機以取閩  
南成功卒不能用滇中事急公復遣子木入臺責成功以  
出師成功方得臺不能行壬寅滇中陷成功亦卒于臺公  
哭曰已矣吾無望矣復還軍林門會閩南諸遺老謀復奉

魯王監國貽書來商公又喜卽以書約故尚書盧公若騰而下勸以大舉又擬上詔書一道又以書約成功子經勸以亞子錦囊三矢之業于是公厲兵束裝以待閩中之問是年浙督趙公廷臣與中朝所遣安撫使各以書招公公復安撫書大畧言不佞所以百折不回者上則欲匡扶社稷下則欲保捍桑梓乃因國事之靡寧而致生民之愈蹙十餘年來海上芻蕘糗糒之供樓櫓舟航之費敲骨吸髓可謂惕然况復重之遷徙訖以流離哀我人斯亦已勞止今執事旣以保民息兵爲言則莫若盡復濱海之民卽以濱海之賦畀我在貴朝旣捐棄地以收人心在不佞亦暫息兵端以俟天命當與執事從容羊陸之交別求生聚

教訓之區于十洲三島間而沿海藉我外兵以禦他盜是珠嵯雖棄休息宜然朝鮮自存艱貞如故特恐執事之疑且畏耳則請與幕府約但使殘黎朝還故土不佞卽當立掛高帆不重困此一方也又復督撫書執事新朝佐命僕明室孤臣區區之誠言盡于此閩南消息旣杳鄭經偷安海外公悒悒日甚壬寅冬十一月魯王薨于臺公哭曰孤臣之栖遲有待徒苦部下相依不去者以吾主上也今更何所待乎癸卯遣使祭告于王甲辰六月遂散遣部曲遁于南田之懸壘壘在海中惟山南汊港可通舟楫而其北爲峭壁公結茅焉從者唯故參軍羅子木門生王居敬侍者楊冠玉將卒數人舟子一人浙江提督張杰慮公終爲

患募故校爲僧者偵之會公告糴之舟至以爲故校且已爲僧不之忌也故校出刀以脅之擊殺數人其最後者乃告之曰雖然公不可得也公畜雙猿以候動靜舟在十里之外則猿鳴木杪公得爲備矣故校乃以夜半由山後襲執之并子木冠玉舟子三人時甲辰七月十七日也十九日公至寧杰以轎迎之方巾葛衣而入至公署歎曰此沈文恭故第也而今爲馬厩乎杰以客禮延之舉酒屬曰遲公久矣公曰父死不能葬國亡不能救今日之舉速死而已數日送公于杭杰遣官護行有防守卒史丙者坐公船首中夜忽唱蘓子卿牧羊曲以相感動公披衣起曰汝亦有心人哉然吾志已定汝無慮也扣舷和之聲朗朗然歌

罷酌酒慰勞之浙督趙公寄公獄中而供帳甚隆許官吏願見者勿禁公終日南面坐拱手不起見者以爲天神九月初七日公赴市望鳳皇山一帶曰好山色賦絕命詞挺立受刑子木等三人殉焉公之未死也嘗賦詩欲葬湖上岳于二墓之間于是鄞人故御史紀五昌出貲令公甥朱相玉購公首而杭人張文嘉等殮之有杭人朱錫九兄弟豫爲公買地經紀之而鄞人萬斯大等葬之西湖之南屏山從公志也姚江黃公宗羲爲之銘子木等三人附于旁公丙戌以前文字皆無存今所存者有奇零艸冰槎集北征錄采薇吟共八卷公旣愛防守卒史丙遂日呼共語公之集因之以傳

結埼亭集張  
神道碑

乾隆四十九年

賜諡忠烈



鮎埼亭集外編云尚書之集翁州鷺門之史事所徵也吾聞尚書既被執籍其居無所有但得箋函二大籙皆中原薦紳所與往還送入帥府薦紳輩俱遣說客請帥焚之帥府亦恐搖人心如其請投之一炬火既熄有二殘冊耿耿不可爇左右異而視之則尚書之集也說客因竊諸懷而出遂盛傳于人間其奏疏書檄諸種曰冰槎集其古今體詩曰奇零艸曰采薇吟其己亥紀事曰北征錄共十二卷附以鄉薦經義一卷予又爲作詩話二卷以詳其集中贈答之人與其事云

謝春草撰張公傳云九月七日幕府請公詣市公賦絕命詩曰我年適五九復逢九月七大厦已難支成仁萬事畢

四明談助

卷十二

十九

遂授命武林張文嘉甬水萬斯大僧超直讀公遺詩曰國亡家破欲何之西子湖頭有我師日月雙懸于氏墓乾坤半壁岳家祠慚將赤手分三席特爲丹心借一枝他日素車東浙路怒濤豈必盡鴟夷乃葬公于西湖之陰先是鴻勳執公之日盡聚公書籍于庭燬之有鄞人朱金瓏妻李氏時爲勳女師急遣侍鬟向焰中取書得公所著北征錄奇零草勳追之李氏易案上邸報二本應追者投諸火今黃南雷據二書次第之以撰墓誌雯撫墓誌芟補之以立傳皆李氏力也

鴻勳張杰字

勾餘土音擬薤露詞

試一擲

張尚書呼盧

百萬亦儋石何妨試一擲阿翁懼我不保家小草遠志定  
難測他年更一擲幾幾席卷大江北

詩話尚書少喜呼盧以此爲其尊公所怒幾于被逐

蘇卿諒弗聽

小校勸忠

穹廬雲冥冥下有李陵說蘓卿蘓卿諒勿聽我懼蘓卿稍  
愛生莫將百鍊精一旦喪令名蘓卿諒勿聽我假清歌爲  
寄聲

詩話蒼水尚書被逮有小校在其船首唱蘇子卿牧羊  
曲尚書笑曰有心哉中夜起而和之

袁陶軒鄧北雜詩

航海歸來十九年官亭月色倍堪憐疊山遲死文山早御

四明談助

卷十二

二十

史叢祠屋數椽

張忠烈煌言以順治丙戌航海康熙甲辰正命凡十九  
年可憐今夜官亭月疊山遲死文山早並忠烈被執後  
詩句見續耆舊集陳恭潔良謨爲甲申十九忠臣之一  
其祠在城北娑蘿園見曹志

初公以爭頒詔事與同里楊侍御文瓚忤遂不復面及戊  
子侍御一門死節公哭之慟曰負吾良友公之初入海也  
嘗遇風失維飄至荒島絕食夢一金甲神告之曰贈君千  
年鹿遲十九年還我次早果得一鹿蒼色人食一臠積日  
不饑及被執又夢金甲神來招之蓋十九年矣妻董氏子  
萬祺並先公三日戮于鎮江後以再從子鴻福爲公後羅

子木者名綸以字行溧陽人也己亥公在江上子木挾策上謁有清河李萼之目欲留之幕中以父老辭及公之蕪關子木之族父蘊章故在成功軍中引見成功江寧之敗也子木固請成功無遽去而不能得成功因強子木奉父泛海子木至海上不欲參成功軍事旋奉父北行將赴公營卒與大兵遇格鬪子木墜水得救起而其父被縛去子木展轉閩南思出奇計以救父逾時不得音問復赴公營公勉以立功卽爲報仇遂相依不去以死冠玉鄞人制府以其年少將脫之固請從死王居敬者字畏齋一字采薇黃巖人也公被執居敬以計得脫其後爲僧名超邈頗能言公遺事亦不負公者而前此誘執公之故校得以功

四明談助

卷十二

二十一

授千戶奉大帥命巡海島猝遇公之舊將憤其害公執而

殺之

神道碑後段

勾餘土音甬上雜歌

羊山吟

詩注爲蒼水尚書作也昌國大洋有羊山多羊然不可烹蓋神物也尚書泊軍山下軍士不知而烹之未熟而

風濤大起軍士溺者無算義陽王豫其禍

鄭成功以師會公北行推

公監軍泊舟羊山時戊戌七月也

殺函失鹿鹿有歸芒碭斬蛇蛇弗違赤烏白魚歸新命陳倉雌雄寶雞雙雙飛孤臣徒搏雕虎將何爲爾羊來思角戢戢馴擾直似鷗忘機鷓兒軍士偶不戒誰知忽震天狼

威鞭龍龍髯墮駕鼉鼉梁疲騎鯨鯨尾赤跨鰲鰲背危神  
鱮出沒封豕隨水犀百萬聲如雷鸛乎鷺乎一網盡爾羊  
助天爲虐是耶非孤臣獨抱啼鵑悲嗚呼孤臣獨抱啼鵑  
悲

詩話羊山以羊得名今謂以唐之羊府君僕得名者謬  
府君固有功于吾土然今海上香火之盛則却以羊山  
之故可爲一笑

勾餘土音擬薤露詞

方寸亂

羅參軍思親

長嘯窮島問我今方寸亂報讐良亦難得報嗟已晚招討  
投東寧尙書歸石浦我讐憑誰報鬱陶更誰語

四明談助

卷十二

二十二

詩話羅子木參軍以父爲閩兵所擒欲倚鄭張二軍以  
報讐鄭入臺灣張歸南田參軍失望朝夕痛哭

張督師畫像記

結埼亭集外編

吾鄉傳張督師畫像者頗多其遺集卷首亦有之而神氣  
骨相各不同先伯母自黃巖歸予以叩之則曰無一肖者  
嘗聞先公于甲辰錢塘獄中曾寫一像當有存者汝曷訪  
之予乃貽書訪之萬九沙先輩而九沙曰有之因摹寄焉  
先伯母曰是已予遂取姚江黃先生之志楊徵士遴之記  
及吳農祥傳讀于先伯母旁先伯母曰惟吳傳舛戾無可  
信者然吾所記軼事雖耄忘十九尙有足以補黃楊之闕  
汝其識之先公生平不執宿見畫江之役閩中以詔書至

張公國維熊公汝霖謂不宜開讀以阻軍氣朱公大典錢公肅樂恐啓爭端相持未下當時庶僚疏論此事者李侍郎長祥與先公右張而楊侍御文瓚右朱先公卽出揭力排楊由是相爲水火及議遣大臣入閩先公方以翰林兼行人請得輔行以折閩人之詰難已而楊之兄弟娣姒一門死義先公在海上貽書汝諸祖以爲媿良友寄三詩弔之今其牘尚有存也舟山之陷也張名振初聞大兵三道並出自以習熟形勢謂蛟關天險不可旦夕下乃悉其銳師奉王揚聲趨松江以牽舟山之勢是時先公亦爲所拉同在行間不謂蕩吳失守以火攻死一夕昏霧大兵畢渡名振已抵上海聞變遽還則不及矣謂其輕出則可

謂其奉王以逃則誤也是時名振老母愛弟妻子俱在城中卒以一門殉使其逃則何不盡室以行乎甲午名振邀先公入長江誠意伯劉孔昭亦同行或言孔昭先朝巨奸豈可與共事先公曰孔昭之亂南都擢髮不足罄其罪然當趙之龍輩迎降恐後獨全軍出海則尚有可錄者今托同仇之義以來疾之已甚恐其爲馬士英之續也聞者躉焉己未名振病卒遺令以部卒來屬先公麾下始盛鄭氏遣人來通好先公言監國乾侯之辱鄭氏修唐藩頒詔之隙也然鄭氏不肯負唐吾又豈敢負魯故雖與鄭氏合從而終爲魯鄭氏亦諒公之誠也以公誼相重焉是時鄖陽山寨有所謂十三家軍者滇事之急先公嘗遣吳職方祖

錫往說之令出兵撓楚以救滇而不克壬寅而後先公貽書汝祖以事不可爲欲散其軍然日復一日以王在也直至甲辰王薨而後決計入山故采薇之吟自此而始先公有從弟從軍海上入山以後不知所終聞有冒其名至錢塘者爲諸遺民所詰而去先伯母之所傳如此是時年八十矣牙齒俱脫懸畫像于房喃喃然且泣且語每語又於邑聞者皆泣下而督師之鬚眉亦浮動紙上予年時十八據觚而聽聽已卽記之然其文草草未就也未幾先伯母返黃巖踰年而卒雍正己酉始重爲詮次而記之畫像之首歐公記王彥章畫像多正舊五代史之謬者予文雖劣亦不爲無補也

四明談助

卷十二

二十四

郡學宮

在府治北鑿橋西唐貞觀間詔州縣作孔子廟時鄞尚屬越州則州廟應在紹興開元間諡孔子爲文宣王于是稱文宣王廟二十六年始建明州于小溪在四明山之勾章地則州廟當隨州立矣寶應廣德間州燬于袁晁之亂大歷間守裴倣始興茨塾見王密製倣紀德碑貞元四年守王沐始創夫子廟見寶志此皆就小溪州廟而言也太和四年修之見鄭耕老修學記時在長慶遷州治之後廟在今府治地但所建處不可攷修之者刺史季文孺也至宋天禧二年守李彝庚始徙于今地殿後造明倫堂前後泮池合廟學爲一崇寧間詔號大成殿建炎兵燬獨殿及治平中所製鐵香爐與殿前後古柏六皆無恙郡

人林暉捐金草立鬻宇紹興七年守仇愈初立儀門泮宮門  
廣講堂東西齋舍

東三齋曰上達廣譽造道西三齋曰登賢成己時升

庖湍具脩李璜

爲之記淳熙三年判府魏王愷築射圃建觀德亭咸淳六年  
歲久漸撓守洪燾更造王應麟爲記元至元十九年廟學悉  
火于兵惟存臺門三間教授潘夢桂黃裳吳宗彥史復伯經  
始之殿廡堂齋畧具二十八年浙東廉訪使陳祥重建儀門  
賁飾貌像次年建尊經閣王應麟爲之記明洪武二年興學  
設官十五年立臥碑永樂十二年知府魏宗賁飾像貌成化  
三年守方達修之黃潤玉爲記嘉靖九年奉旨撤像祀立牌  
位爲至聖先師孔子神位改大成殿爲先師殿大成門爲廟  
門又別立祠祀啓聖公以顏子父路曾子父點子思父鯉孟

四明談助

卷十二

二十五

子父激公宜配享從宏治朝學士程敏政之議也

曹志參敬止錄

詠歸亭 杏壇 草庭

舊有詠歸亭在臺門外東先是臺門橫路東西有石柱牌門  
各一座東通街西通織染局元至正間總管王元恭除牌門  
斲斷行路就用四石柱爲詠歸亭復築杏壇對立于西後廢  
明正統間守陸奇卽舊址建文昌閣 舊鬻河四周學宮名  
腰帶河今西南淤塞舊又有草庭在杏壇之南延祐五年教  
授薛朞建有屋數楹爲教授廳事至正七年學正董宗文重  
修劉仲愚爲記今已廢宗文名彝鄱陽人

敬止錄

歷朝師儒之制

唐以前郡縣但立文宣王廟以祀孔子其時未有學校故亦

無學官宋慶歷中詔天下俱立學校顧師儒之官朝廷未嘗特命郡邑有司自延名儒主之又不設學官弟子民之秀者聽其自受業而已元豐初立法試學官上等爲博士下等爲學正學錄齋長齋諭諸生課業以三八日爲則初八試經義十八試論廿八試策生員會集則以鼓節之昕三暮四講五集六升七退八賞九罰十此鼓之節也南宋迄元旣立教官而鄉城內外書院復有山長主之教官則命于朝廷山長則監司自聘而上其名于朝給以廩精明制郡設教授一人爲之長訓導佐之生員之肄業于學者有廩膳生增廣生附學生又有青衣生社生以待諸生之遞降者 國朝之制大抵如舊

曹志參  
敬止錄

歷代膽學田糧并建修碑記俱詳敬止錄畧見

#### 四明談助

#### 卷十二

二十六

#### 郡邑諸志

#### 林司業上孔子廟堂議

孔子自魯哀公誄詞稱尼父漢平帝始諡爲褒城侯宣尼公唐明皇追諡爲文宣王釋奠用宮懸弟子爲公侯伯肖像俱被冕服至元武宗加號大成明洪武四年國子司業林濂上孔子廟議

畧曰古者主人西向几筵在西也漢章帝幸魯祠孔子帝西面再拜今襲開元二十七年之制遷神南面非神道尚右之義矣古者木主栖神天子諸侯廟皆有主大夫束帛士結茅爲蒹無像設之事今搏土爲像失神而明之之義矣開元禮國學祀先聖孔子以顏子等七十二賢配諸州惟顏子今以



苟况之言性惡揚雄之事王莽王弼之宗莊老賈逵之忽細行杜預之建短喪馬融之黨附勢家亦廁其中吾不知何說也古者立學耑以明倫子雖齊聖不先父食久矣今回參伋坐饗堂上而其父列食于兩廡吾不知何說也古者士見師以菜爲之贄故始入學者必釋菜以禮其先師釋奠有樂無尸釋菜無樂是二釋之重輕以樂之有無也今襲用魏漢津所制大晟樂可乎哉若乃建安熊氏欲以伏羲爲道統之宗神農黃帝堯舜禹湯文武次而列焉臯陶伊尹太公周公暨稷契夷益傳說箕子皆天子公卿之師式官秩祀天子之學若孔子實兼祖述憲章之任其爲通祀則自天子下達苟如其言道統益尊三皇不汨于醫師太公不辱于武夫矣

四明談助

卷十二

二十七

議上不報至嘉靖九年輔臣張璁始釐正祀典然其議實發于程學士敏政而更權輿于林司業濂也

敬止錄

鄉飲酒禮

舊俗以歲之元日或冬至太守率鄉之士大夫釋菜于先聖先師而後會拜堂上長幼有序登降有儀擯介有數倣古鄉飲禮建炎學燬禮廢紹興七年學重建守仇愈復行故事後三年仇公復來置田百有六畝支其費又三年郡人林保爲比部郎聞于朝遂取其式頒行天下明州行之如初而仇公所置田移以養士禮遂廢乾道中秘閣張津守郡撥沒官之產以補之王伯庠記諸石官產段刻于碑陰厥後歲雖會拜

無復舊典

寶慶志

黃南山簡要志洪武十六年六月十七日頒行鄉飲圖式于天下一依古制歲以正月望十月朔舉行大概鄉大夫指知府言一人爲主設位于堂東楹內西向其僚屬以爵列席于主人之後重行西向北上設大賓位于堂西牖前南向請民之高年有德者居之立介以輔賓設位于堂西楹內東向面主請民之高年淳篤者居之是二者尊其德也此外衆賓齒最長者三人爲三賓另席于大賓之西南面東上餘衆賓列席于西序內東向北上此皆尊以齒也若有居官而致仕者請爲僕爵高者特位於堂室戶前南向餘則爵列於僕位之東南向西上多則列席於僚屬之上西向北上此皆尊以爵也是爵也德也齒也三者天下之達尊也下至里社里長爲主悉依前例行之無致仕官則虛僕位凡民得罪經徒決者位於堂下飲酒而媿之儀文之盛視昔有加焉 按傳載先生年十二聞郡守王璉舉鄉飲酒禮就郡庠觀默識其儀歸書于冊師大奇之當是終先生之世不改故作志時所載如此敬止

錄

### 歷朝賢學師

宋明州教授鄭耕老

紹興間教授明州以興起斯文爲己任日進諸生講明聖賢大學之道文章簡古淡雅以韓歐爲則嘉靖志前有樓郁汪洙王伯庠三教授皆本州人傳見各居第下

宋明州教授傅伯成

### 四明談助

#### 卷十二

二十八

字景初少從朱夫子學隆興元年進士試中教官科授明州教授以年少嫌以師自居日與諸生論質往復後多成才官終龍圖閣學士語及奸人誤國害正詞色俱厲嘗慕尸諫草疏畢朝服而逝端平三年賜諡忠肅年八十四

宋史

本傳

### 宋慶元教授李韶

字元善嘉定四年進士調慶元教授丞相史彌遠薦士充學職公不與袁正獻燮求學官射圃益其居亦不與正獻以是更敬公以廉勤薦遷主管三省架閣文字

宋史本傳

### 宋慶元教授方萬里

寧宗嘉定間方公萬里爲郡學教授郡有學山一萬一千

## 四明談助

### 卷十二

二十九

七百餘畝係灌頂山普淨寺租佃歲入錢三百貫後有倚勢採鐵于此者屢禁不止方公上劄子謂四明山脉貼近會稽皇陵禁民鼓鑄時允其言永爲禁例劄子見寶慶志亦載曹志山川部

### 宋末教授魏新之

字德夫宋末教授以正學爲己任推明中庸性道教奧旨反覆詳盡初鄞士多宋金溪二陸之學聞公之教翕然從之學錄劉光嘗撰孝經集解公爲刊正十一條皆關物則民彝之大者光不覺下拜德祐二年元兵入臨安游軍至鄞時學設兩教授號東西廳其一教授王樾懼甚曰吾儕死生決于今日矣公從容答曰非止今日有生之初已定

不若聽之顏色不少變

嘉靖志

元教授黃裳

字景杜眉州人至正二十二年教授學行老成人多重之

曹志工書有石刻大草在明倫堂右壁今無存

敬止錄

元學正孔昭孫

字明遠三衢人孔子十二世孫時禮部尚書王先生應麟

師表後進門無雜賓昭孫以通家子執經正譎有教授某

恣睢自負語侵先生昭孫乃憤然曰吾不能與之共處疏

其謬誕十數事鳴于憲府人益奇其伉直終袁州知事

清容

居士集

元訓導王厚孫

四明談助

卷十二

三十

字叔載尚書厚齋先生孫元統間任凡學田在鄞及沙岸

在昌國者皆爲豪民侵奪力陳復之弟寧孫相繼爲郡學

訓導

敬止錄

明教授崔植

字斯立鄞人洪武間爲明州教授桂彥良有送崔斯立序

敬止錄傳附見東門崔氏下

桂正字彥良送崔斯立

環千里者爲郡必有任治與教之責者則今之知府與教授而已然知府秩高而祿厚有吏卒刑禁以威其上故人畏而敬之教授秩卑而祿薄無吏卒威令徒以禮義化諸生故人狎而易之不惟人之視已爲然雖自視亦以爲當

然苟知治之與教職雖異而道則同朝廷所以責任于我者何如其重也烏可以秩之崇卑而有所加損哉惟不知此道也故爲知府者恒以位高而矜乎下爲教授者恒以位卑而諂乎上是二者胥失之矣詎不深可慨耶吾友崔君斯立學優而行純氣和而容肅居家以孝友稱交友以信義聞博通經史尤長于春秋嘗分教吾郡庠學者爭師事之受業而出仕者衆矣由是郡侯以公論舉爲郡博士既上試于天官移南宮考之又任首選咸欲薦諸朝留教國子則辭曰吾家貧而母老願歸郡學以就祿養足矣他非我志也于是俯就郡博士之職以去過予而謂曰子知我者也可無一言以贈乎予義不容默故書治與教之事

爲崔君勉吾聞郡侯賢而下士崔君有學有德必能以師道自任故萬無前二者之失然猶恐習俗之故勢有不能已耳故復書此以規之亦朋友責難之道也

明教授成矩

字叔度蘓州舉人先爲奉化訓導九載考績黃南山有贈序成化間陞寧郡教授楊文懿有序載敬止錄

楊文懿送成先生序

古者閭塾黨庠術序之制所謂師者乃其鄉之耆老仕焉而已者也所謂弟子者乃其鄉之俊秀學焉而未仕者也師之道德弟子之性行交相知之而其情若家人父子之相親故其教易行士易成俗易化也後世始用仕者爲學

校之師或中州之人而師于荒服或生冀方豳土而師於蠻烟蠻雨之鄉奔走萬里而至語言不通習尚殊絕若不能以一朝居而其道藝之美弟子亦未能遽信之也若是而欲行其教成其材善其俗也不已難乎若夫九州之人各師於近境興馬舟航朝發而夕至弟子聞風而已嚮慕則其情自不能以不親而教不患於不行矣夫豈若彼之師於遐方異域而艱於成材善俗者耶將不殆度於古也耶蘓郡成先生叔度今爲吾明郡之師此二郡皆號文獻之邦東西相望僅隔一浙水耳且先生幼隨尊父宦游與其領鄉書典教鐸皆在浙水之東而比者在奉化又明之屬邑也其謙恭樂易勤於啓迪後學凡明之鴻生茂士孰不嚮而仰之所謂師於越境與弟子相知而殆度於古者其孰有加焉夫爲師者恒苦於弟子之難教而爲弟子者亦恒病夫師之難親反是則古道不難復矣用是賀吾明之士之得師又以賀先生之得弟子

明教授陳中立

祁門人嘉靖間由舉人合山東滕縣以質直爭疑獄忤上官改教寧波崇尚忠實而表裏洞見無幾微回互士有不可卽面折不爲後言時訪貧士推所有周之甄別課業人

咸推服

嘉靖志

泮水禁蛙鳴

泮水池清瀾池春蛙皆不鳴俗云守李夷庚以術禦之泮水

蛙鳴境內必出掄魁寶慶志

林司戶倡復州學

林司戶暉字公著嘗任韶州司戶恂恂孝謹輕財樂施大觀間陳忠肅公瓘寓居于鄞公獨厚之雖其徙謫他所問遺不絕建炎四年州燬于兵公未暇葺舍宇首出錢數十萬理學宮且輸田半頃爲養士費太守以風郡人鬻宇漸復舊觀聞志郭公子以北學授諸生

郭維其先河南人父貫官長沙判建炎間維徙居四明以北學教授諸生從者如雲聞志

顏制帥蠲除砂租

府學鄉有昌國縣石弄等山砂岸租錢三萬七百七十九貫

四明談助

卷十二

三十三

四百文孝宗時皇子魏王愷判明州奏請撥賜令本學自擇砂主歲收養土砂岸者瀕海細民衆共漁業之地也數十年後龍斷之夫倚勢作威恣行刻剝有所謂艚頭錢下筭錢曬地錢以至竹木薪炭莫不有征豆麥果蔬亦皆不免名爲抽解實則攫拏猶且計口輸金下及醫卜工匠創名色以苛取利入私室怨歸公家已非一日甚至廣布爪牙大張聲勢有砂主有專櫃有牙枰有攔脚數十爲羣邀截衝要稍或不從便行羅織私置停房甚于囹圄拷掠苦楚非法厲民含冤吞聲無所赴愬鬪毆殺傷時或有之強者日以滋奸弱者迫而爲盜薄人于險靡所不爲推究其故亦緣州縣利及歲入之額致使豪強藉爲漁奪之媒淳祐六年制帥集撰顏公頤仲

具劄申省請在外官民戶砂岸一例蠲除弛利于民使各以  
保護鄉井爲念却將別項撥助府學養士形勢之家令其聽  
民從便漁業不得妄作名色復行占據語詳申省劄子全文  
見寶慶志

顧神童辭貢不就

顧隱君輝字德潤號守齋大父鄉貢應春父學海先生叔川  
守齋幼承家學十歲卽善屬文郡博士俞希器欲以神童貢  
辭不就旣長肆力經傳閉門却掃默索精思垂三十年著書  
數百卷名守齋類稿慈谿桂彥良其外弟也請于金華宋文  
憲公濂爲之序

嘉靖志

序載聞志

曹秀才故婦悔羨

四明談助

卷十二

三十四

曹詠侍郎妻碩人厲氏餘姚大族始嫁四明曹秀才與夫不  
相得化離而歸乃適詠時尙武弁不數年以秦檜之姻黨易  
文階驟至徽猷閣守明先夕張燈州治大合樂宴飲曹秀才  
攜家來觀見碩人服用精麗左右供侍脩極尊嚴謂其母曰  
渠乃合在此中居享如此富貴吾家豈能留歎息久之詠日  
益顯爲戶部侍郎尹京檜之殂詠貶新州而亡碩人領二子  
取喪歸葬二子後不肖家貧蕩析至不能給朝晡趙德老觀  
文亦厲氏壻碩人從父妹也憐其老且無聊招置四明里第  
養之終身碩人間出訪親舊過故夫曹秀才家門庭整潔花  
木葳茂顧侍婢曰我當時能自安于此豈有今日因泣下數  
行二十年間夫妻更相悔羨世界反覆不可料如此

宋龐元  
英談藪



明鄉隅各立社學 附錄

社學始于洪武八年設立延師儒以教迪民間子弟洪武二十年令民間子弟讀大誥律令者赴京投禮部較其所誦多寡次第以給優賞

正統元年令各處提學官及司府州縣官嚴篤社學不許廢弛其有俊秀向學者許補儒學生員

成化元年詔各府州縣振興社學招聘名儒以誨民間有志之子弟

宏治元年申飭各府州縣社學用心教養民間子弟以勤怠爲印官殿最

宏治十七年詔令各府州縣社學悉心訓迪其民間童子送

四明談助

卷十二

三十五

進立程課讀四書明熟兼講習冠昏喪祭之禮

簡要志載在城及附郭六隅每隅一所鄉都每都一所成化志載坊隅四所鄉隅十三所嘉靖間坊隅六所令趙民順修後僅存西南隅一圖三圖各一所久而悉廢

聞志